

魏·曇鸞大師註

往生論註

佛陀教育基金會
印贈

一切佛經，及闡揚佛法諸書，無不令人趨吉避凶，改過遷善。明三世之因果，識本具之佛性。出生死之苦海，生極樂之蓮邦。讀者必須生感恩心，作難遭想。淨手潔案，主敬存誠。如面佛天，如臨師保。則無邊利益，自可親得。若肆無忌憚，任意褻瀆。及固執管見，妄生毀謗，則罪過彌天，苦報無盡。奉勸世人，當遠罪求益，離苦得樂也。

目錄

- 一、往生論注敘…………… 1
- 二、北魏曇鸞法師傳…………… 9
- 三、讚阿彌陀佛偈…………… 11
- 四、無量壽經優婆提舍願生偈注卷上…………… 45
- 五、無量壽經優婆提舍願生偈注卷下…………… 113

往生論註敘

生死吾人第一大事也。淨土法門了生死無上妙法也。一代時教浩若淵海。其究竟暢佛普度眾生之本懷者。唯淨土一法而已。以下凡信願念佛。即可帶業往生。上聖若肯回向。速得圓成覺道。仗佛慈力。與唯仗自力。其難易固日劫相倍。天親菩薩廣造諸論。宏闡佛乘。復宗無量壽經。作願生偈論。示五門修法。令畢竟得生。具顯禮拜讚歎作願觀察回向之法。於觀察門。詳示淨土莊嚴。如來法力菩薩功德。凡見聞者。悉願往生。曇鸞法師撰註詳釋。直將彌陀誓願。天親

衷懷徹底圓彰和盤托出若非深得佛心具無礙辯
何克臻此夫淨土一法爲一切諸法之所歸趣以故
華嚴證齊諸佛之等覺菩薩尙須以十大願王回向
往生則文殊普賢馬鳴龍樹智者慈恩清涼永明等
自行化他同歸淨土者有由來矣知此則唯執自力
不仗佛力者可以恍然驚憬然悟以期現生卽得出
此娑婆生彼極樂與觀音勢至等諸上善人俱會一
處常時親炙阿彌陀佛以冀證無生忍圓滿菩提而
後已也吾言不足信請質之普賢菩薩自可無疑矣
民國十一年壬戌五月望日常慚愧僧釋印光謹撰

婆藪槃豆法師傳

梁眞諦譯
節錄

婆藪槃豆法師者北天竺富婁沙富羅國人也富婁沙譯爲丈夫富羅譯爲土此土有國師婆羅門姓憍尸迦有三子同名婆藪槃豆婆藪譯爲天槃豆譯爲親天竺立兒名有此體雖同一名復立別名以顯之第三子婆藪槃豆於薩婆多部出家得阿羅漢果別名比鄰持定梨反跋婆比鄰持是其母名跋婆譯爲子亦曰兒長子婆藪槃豆是菩薩根性人亦於薩婆多部出家得大乘空觀因此爲名名阿僧伽阿僧伽譯爲無著數上兜率多天諮問彌勒大乘經義造大乘

經優波提舍。解釋佛所說一切大教。第二婆藪槃豆。亦於薩婆多部出家。博學多聞。徧通墳籍。神才俊朗。無可爲儔。戒行清高。難以相匹。兄弟既有別名。故法師但稱婆藪槃豆。造七十真實論。破外道所造僧佉論。首尾瓦解。無一句得立。於阿踰闍國起三寺。一比丘尼寺。二薩婆多部寺。三大乘寺。法師爾後更成立正法。先學毗婆沙義。已通。後爲眾人講毗婆沙義。一日講卽造一偈。攝一日所說義。刻赤銅葉。以書此偈。標置醉象頭上。擊鼓宣令。誰人能破此偈。義能破者。當出。如此次第。造六百餘偈。攝毗婆沙義盡。一一皆

爾遂無人能破。卽是俱舍論偈也。偈訖後卽作長行解偈。立薩婆多義。隨有僻處。以經部義破之。名爲阿毗達磨俱舍論。法師旣徧通十八部義。妙解小乘。執小乘爲是不信大乘。謂摩訶衍非佛所說。阿僧伽法師住在丈夫國。旣見此弟聰明過人。識解深廣。該通內外。遣使往阿踰闍國報云。我今疾篤。汝可急來。天親卽隨使還本國。與兄相見。諮問疾源。兄答云。我今心有重病。由汝而生。汝不信大乘。恆生毀謗。以此惡業必永淪惡道。我今愁苦。命將不全。天親聞此驚懼。卽請兄爲解說大乘。兄卽爲略說大乘要義。法師聰

明卽於此時。悟知大乘理。應過小乘。於是就兄徧學大乘義。後如兄所解。悉得通達。解意旣明。思惟前後。悉與理相應。無有乖背。始驗小乘爲失。大乘爲得。若無大乘。則無三乘道果。昔旣毀謗大乘。不生信樂。懼此罪業。必入惡道。深自咎責。欲悔先過。往至兄所。陳其過迷。今欲懺悔。先愆。未知何方得免。云我昔由舌。故生毀謗。今當割舌。以謝此罪。兄云。汝設割千舌。亦不能滅此罪。汝若欲滅此罪。當更爲方便。法師卽請兄說滅罪方便。兄云。汝舌能毀謗大乘。汝若欲滅此罪。當善解說大乘。阿僧伽法師殂歿後。天親方造大

乘論解釋諸大乘經。華嚴涅槃法華般若維摩勝鬘
等諸大乘經論。悉是法師所造。又造唯識論釋攝大
乘三寶性甘露門等諸大乘論。凡是法師所造。文義
精妙。有見聞者。靡不信求。故天竺及餘邊土。學大小
乘人。悉以法師所造爲學本。異部及外道論師。聞法
師名。莫不畏伏。於阿踰闍國捨命。年終八十。雖迹居
凡地。理實難思議也。

聖賢傳記

三

北魏曇鸞法師傳

續高僧傳
樂邦文類

曇鸞雁門人。少遊五臺山。見神迹靈異。因發信心。出家。讀大集經。以其詞義深密。因爲註解。文言過半。便感氣疾。周行醫療。旣而歎曰。人命危脆。旦夕無常。吾聞長年神仙。往往間出。得是法已。方崇佛教。不亦可乎。遂往江南陶隱居所。懇求仙術。隱居授以仙經十卷。欣然而還。至洛下。遇三藏菩提留支。鸞問曰。佛法中頗有長生不死法。勝此仙經者乎。留支曰。此方何處有長生不死法。縱得長年。少時不死。卒歸輪轉。曷足貴乎。夫長生不死。吾佛道也。乃以十六觀經授之。

曰。學此則三界無復生。六道無復往。盈虛消息。禍福成敗。無得而至。其爲壽也。河沙劫量。莫能比也。此吾金仙氏之長生也。鸞大喜。遂焚仙經。而專修淨觀。自行化他。流布彌廣。魏主重之。號爲神鸞。勅住并州大寺。晚移汾州玄中寺。興和四年。一夕室中見梵僧。謂曰。吾龍樹也。久居淨土。以汝同志。故來相見。鸞自知時至。集眾教誡曰。勞生役役。其止無日。地獄諸苦。不可不懼。九品淨業。不可不修。因令弟子高聲唱佛。西向稽顙而終。在寺者俱見幡華幢蓋自西而來。天樂盈空。良久乃已。

讚阿彌陀佛偈

魏西河石壁谷玄中寺沙門曇鸞撰

南無阿彌陀佛

譯名無量壽
傍經奉讚

南無至心歸命禮西方阿彌陀佛

現在西方去此界 十萬億刹安樂土

佛世尊號阿彌陀 我願往生歸命禮

願共諸眾生 往生安樂國

南無至心歸命禮西方阿彌陀佛

成佛已來歷十劫 壽命方將無有量

法身光輪徧法界 照世盲冥故頂禮

願共諸眾生 往生安樂國

南無至心歸命禮西方阿彌陀佛

智慧光明不可量 故佛又號無量光

有量諸相蒙光曉 是故稽首真實明

願共諸眾生 往生安樂國

南無至心歸命禮西方阿彌陀佛

解脫光輪無限齊 故佛又號無邊光

蒙光觸者離有無 是故稽首平等覺

願共諸眾生 往生安樂國

南無至心歸命禮西方阿彌陀佛

光雲無礙如虛空

故佛又號無礙光

一切有礙蒙光澤

是故頂禮難思議

願共諸眾生

往生安樂國

南無至心歸命禮西方阿彌陀佛

清淨光明無有對

故佛又號無對光

遇斯光者業繫除

是故稽首畢竟依

願共諸眾生

往生安樂國

南無至心歸命禮西方阿彌陀佛

佛光照耀最第一

故佛又號光炎王

三塗黑闇蒙光啟

是故頂禮大應供

願共諸眾生 往生安樂國

南無至心歸命禮西方阿彌陀佛

道光明朗色超絕 故佛又號清淨光

一蒙光照罪垢除 皆得解脫故頂禮

願共諸眾生 往生安樂國

南無至心歸命禮西方阿彌陀佛

慈光遐被施安樂 故佛又號歡喜光

光所至處得法喜 稽首頂禮大安慰

願共諸眾生 往生安樂國

南無至心歸命禮西方阿彌陀佛

佛光能破無明闇

故佛又號智慧光

一切諸佛三乘眾

咸共歎譽故稽首

願共諸眾生

往生安樂國

南無至心歸命禮西方阿彌陀佛

光明一切時普照

故佛又號不斷光

聞光力故心不斷

皆得往生故頂禮

願共諸眾生

往生安樂國

南無至心歸命禮西方阿彌陀佛

其光除佛莫能測

故佛又號難思光

十方諸佛歎往生

稱其功德故稽首

願共諸眾生 往生安樂國

南無至心歸命禮西方阿彌陀佛

神光離相不可名 故佛又號無稱光

因光成佛光赫然 諸佛所歎故頂禮

願共諸眾生 往生安樂國

南無至心歸命禮西方阿彌陀佛

光明照耀過日月 故佛號超日月光

釋迦佛歎尚不盡 故我稽首無等等

願共諸眾生 往生安樂國

南無至心歸命禮西方阿彌陀佛

哀愍覆護我 令法種增長 此世及後生

願佛常攝受

願共諸眾生 往生安樂國

南無至心歸命禮西方極樂世界觀世音菩薩

願共諸眾生 往生安樂國

南無至心歸命禮西方極樂世界大勢至菩薩

願共諸眾生 往生安樂國

南無至心歸命禮西方極樂世界諸菩薩清淨大海

眾

願共諸眾生 往生安樂國

普爲師僧父母及善知識法界眾生斷除三障同得
往生阿彌陀佛國歸命懺悔

南無至心歸命禮西方阿彌陀佛

阿彌陀佛初會眾 聲聞菩薩數無量

神通巧妙不能算 是故稽首廣大會

願共諸眾生 往生安樂國

南無至心歸命禮西方阿彌陀佛

安樂無量摩訶薩 咸當一生補佛處

除其本願大弘誓 普欲度脫諸眾生

斯等寶林功德聚 一心合掌頭面禮

願共諸眾生 往生安樂國

南無至心歸命禮西方阿彌陀佛

安樂國土諸聲聞 皆光一尋若流星

菩薩光輪四千里 若秋滿月映紫金

集佛法藏爲眾生 故我頂禮大心海

願共諸眾生 往生安樂國

南無至心歸命禮西方阿彌陀佛

又觀世音大勢至 於諸聖眾最第一

慈光照耀大千界 侍佛左右顯神儀

度諸有緣不暫息 如大海潮不失時

如是大悲大勢至 一心稽首頭面禮

願共諸眾生 往生安樂國

南無至心歸命禮西方阿彌陀佛

其有眾生生安樂 悉具三十有二相

智慧滿足入深法 究暢道要無障礙

隨根利鈍成就忍 二忍乃至不可計

宿命五通常自在 至佛不更雜惡趣

除生他方五濁世 示現同如大牟尼

生安樂國成大利 是故至心頭面禮

願共諸眾生 往生安樂國

南無至心歸命禮西方阿彌陀佛

安樂菩薩承佛神

於一食頃詣十方

不可算數佛世界

恭敬供養諸如來

華香伎樂從念現

寶蓋幢旛隨意出

珍奇絕世無能名

散華供養殊異寶

化成華蓋光晃耀

香氣普熏莫不周

華蓋小者四百里

乃有徧覆一佛界

隨其前後次化去

是諸菩薩僉欣悅

於虛空中奏天樂

雅讚德頌揚佛慧

聽受經法供養已

未食之前騰虛還

神力自在不可測 故我頂禮無上尊

願共諸眾生 往生安樂國

南無至心歸命禮西方阿彌陀佛

安樂佛國諸菩薩 所可宣說隨智慧

於已萬物亡我所 淨若蓮華不受塵

往來進止若汎舟 利安爲務捨適莫

彼已猶空斷二想 然智慧炬照長夜

三明六通皆已足 菩薩萬行貫心眼

如是功德無邊量 是故至心頭面禮

願共諸眾生 往生安樂國

南無至心歸命禮西方阿彌陀佛

安樂聲聞菩薩眾

人天智慧咸洞達

身相莊嚴無殊異

但順他方故列名

顏容端正無可比

精微妙軀非人天

虛無之身無極體

是故頂禮平等力

願共諸眾生 往生安樂國

南無至心歸命禮西方阿彌陀佛

敢能得生安樂國

皆悉住於正定聚

邪定不定其國無

諸佛咸讚故頂禮

願共諸眾生 往生安樂國

南無至心歸命禮西方阿彌陀佛

諸聞阿彌陀佛號 信心歡喜慶所聞

乃暨一念至心者 迴向願生皆得往

唯除五逆謗正法 故我頂禮願往生

願共諸眾生 往生安樂國

南無至心歸命禮西方阿彌陀佛

安樂菩薩聲聞輩 於此世界無比方

釋迦無礙大辯才 設諸假令示少分

最賤乞人並帝王 帝王復比金輪王

如是展轉至六天 次第相形皆如始

以天色像喻於彼 千萬億倍非其類

皆是法藏願力爲 稽首頂禮大心力

願共諸眾生 往生安樂國

南無至心歸命禮西方阿彌陀佛

天人一切有所須 無不稱欲應念至

一寶二寶無量寶 隨心化造受用具

堂宇飲食悉如此 故我稽首無稱佛

願共諸眾生 往生安樂國

南無至心歸命禮西方阿彌陀佛

諸往生者悉具足 清淨色身無可比

神通功德及宮殿

服飾莊嚴如六天

應器寶鉢自然至

百味嘉餚條已滿

見色聞香意爲食

忽然飽足受適悅

所味清淨無所著

事已化去須復現

宴安快樂次泥洹

是故至心頭面禮

願共諸眾生 往生安樂國

南無至心歸命禮西方阿彌陀佛

十方佛土菩薩眾

及諸比丘生安樂

無量無數不可計

已生今生當亦然

皆曾供養無量佛

攝取百千堅固法

如是大士悉往生 是故頂禮阿彌陀

願共諸眾生 往生安樂國

南無至心歸命禮西方阿彌陀佛

若聞阿彌陀德號 歡喜讚仰心歸依

下至一念得大利 則爲具足功德寶

設滿大千世界火 亦應直過聞佛名

聞阿彌陀不復退 是故至心稽首禮

願共諸眾生 往生安樂國

南無至心歸命禮西方阿彌陀佛

神力無極阿彌陀 十方無量佛所歎

東方恆沙諸佛國

菩薩無數悉往觀

亦復供養安樂國

菩薩聲聞諸大眾

聽受經法宣道化

自餘九方亦如是

釋迦如來說偈頌

無量功德故頂禮

願共諸眾生 往生安樂國

南無至心歸命禮西方阿彌陀佛

諸來無量菩薩眾

爲植德本致虔恭

或奏音樂歌歎佛

或頌佛慧照世間

或以天華衣供養

或觀淨土興等願

如是聖眾悉現前

蒙八梵聲授佛記

一切菩薩增願行 故我頂禮婆伽婆

願共諸眾生 往生安樂國

南無至心歸命禮西方阿彌陀佛

聖主世尊說法時 大眾雲集七寶堂

聽佛開示咸悟入 歡喜充徧皆得道

於時四面起清風 擊動寶樹出妙響

和韻清徹遏絲竹 踰於金石無倫比

天華繽紛逐香風 自然供養常不息

諸天復持天華香 百千伎樂用致敬

如是功德三寶聚 故我運想禮講堂

願共諸眾生 往生安樂國

南無至心歸命禮西方阿彌陀佛

妙土廣大超數限 自然七寶所合成

佛本願力莊嚴起 稽首清淨大攝受

願共諸眾生 往生安樂國

南無至心歸命禮西方阿彌陀佛

世界光耀妙殊絕 適悅宴安無四時

自利利他力圓滿 歸命方便巧莊嚴

寶地澄靜平如掌 無有山川陵谷阻

若佛神力須則見 稽首不可思議尊

願共諸眾生 往生安樂國

南無至心歸命禮西方阿彌陀佛

道樹高四百萬里 周圍由旬有五千

枝葉布里二十萬 自然眾寶所合成

月光摩尼海輪寶 眾寶之王而莊嚴

周帀垂間寶瓔珞 百千萬種色變異

光燄照耀超千日 無極寶網覆其上

一切莊嚴隨應現 稽首頂禮道場樹

願共諸眾生 往生安樂國

南無至心歸命禮西方阿彌陀佛

微風吹樹出法音

普流十方諸佛刹

聞斯音得深法忍

至成佛道不遭苦

神力廣大不可量

稽首頂禮道場樹

願共諸眾生 往生安樂國

南無至心歸命禮西方阿彌陀佛

樹香樹色樹音聲

樹觸樹味及樹法

六情遇者得法忍

故我頂禮道場樹

願共諸眾生 往生安樂國

南無至心歸命禮西方阿彌陀佛

蒙道場樹對六根

乃至成佛根清徹

音響柔順無生忍

隨力淺深咸得證

此樹威德所由來

皆是如來五種力

神力本願及滿足

明了堅固究竟願

慈悲方便不可稱

歸命稽首真無量

願共諸眾生 往生安樂國

南無至心歸命禮西方阿彌陀佛

從世帝王至六天

音樂轉妙有八重

展轉勝前億萬倍

寶樹音麗倍亦然

復有自然妙伎樂

法音清和悅心神

哀婉雅亮超十方

故我稽首清淨樂

願共諸眾生 往生安樂國

南無至心歸命禮西方阿彌陀佛

七寶樹林周世界 光耀鮮明相映發

華果枝葉更互為 稽首本願功德聚

願共諸眾生 往生安樂國

南無至心歸命禮西方阿彌陀佛

清風時時吹寶樹 出五音聲宮商和

微妙雅曲自然成 故我頂禮清淨熏

願共諸眾生 往生安樂國

南無至心歸命禮西方阿彌陀佛

其土廣大無涯際

眾寶羅網徧覆上

金縷珠璣奇異珍

不可名寶爲校飾

周帀四面垂寶鈴

調風吹動出妙法

和雅德香常流布

聞者塵勞習不起

此風觸身受快樂

如比丘得滅盡定

風吹散華滿佛土

隨色次第不雜亂

華質柔輒烈芬芳

足履其上下四寸

隨舉足時還如故

用訖地開沒無遺

隨其時節華六返

不可議報故頂禮

願共諸眾生 往生安樂國

南無至心歸命禮西方阿彌陀佛

眾寶蓮華盈世界 一一華百千億葉

其華光明色無量 朱紫紅綠間五色

煒燁煥爛曜日光 是故一心稽首禮

願共諸眾生 往生安樂國

南無至心歸命禮西方阿彌陀佛

一一華中所出光 三十六百有千億

一一光中有佛身 多少亦如所出光

佛身相好如金山 一一又放百千光

普為十方說妙法 各安眾生於佛道

如是神力無邊量 故我歸命阿彌陀

願共諸眾生 往生安樂國

南無至心歸命禮西方阿彌陀佛

樓閣殿堂非工造 七寶彫綺化所成

明月珠璫交露幔 各有浴池形相稱

八功德水滿池中 色味香潔如甘露

黃金池者白銀沙 七寶池沙互如此

池岸香樹垂布上 栴檀芬馥常流馨

天華璀璨爲映飾 水上熠燿若景雲

無漏依果難思議 是故稽首功德藏

願共諸眾生 往生安樂國

南無至心歸命禮西方阿彌陀佛

菩薩聲聞入寶池 隨意淺深如所欲

若須灌身自然注 欲令還復水尋還

調和冷暖無不稱 神開體悅蕩心垢

清明澄潔若無形 寶沙映徹如不深

澹淡迴轉相注灌 焯約容與和人神

微波無量出妙響 隨其所應聞法語

或聞三寶之妙章 或聞寂靜空無我

或聞無量波羅蜜 力不共法諸通慧

或聞無作無生忍 乃至甘露灌頂法

隨根性欲皆歡喜 順三寶相真實義

菩薩聲聞所行道 於是一切悉具聞

三塗苦難名永閉 但有自然快樂音

是故其國號安樂 頭面頂禮無極尊

願共諸眾生 往生安樂國

南無至心歸命禮西方阿彌陀佛

本師龍樹摩訶薩 誕形像始理頽綱

闕閉邪扇開正轍 是閻浮提一切眼

伏承尊悟歡喜地 歸阿彌陀生安樂

願共諸眾生 往生安樂國

南無至心歸命禮西方阿彌陀佛

譬如龍動雲必隨 閣浮提放百卉舒

南無慈悲龍樹尊 至心歸命頭面禮

願共諸眾生 往生安樂國

南無至心歸命禮西方阿彌陀佛

我從無始循三界 爲虛妄輪所迴轉

一念一時所造業 足繫大地滯三塗

唯願慈光護念我 令我不失菩提心

我讚佛慧功德音 願聞十方諸有緣

欲得往生安樂者

普皆如意無障礙

所有功德若大小

迴施一切共往生

南無不可思議光

一心歸命稽首禮

願共諸眾生 往生安樂國

南無至心歸命禮西方阿彌陀佛

十方三世無量慧

同乘一如號正覺

二智圓滿道平等

攝化隨緣故若干

我歸阿彌陀淨土

卽是歸命諸佛國

我以一心讚一佛

願徧十方無礙人

如是十方無量佛

咸各至心頭面禮

願共諸眾生 往生安樂國

南無至心歸命禮西方阿彌陀佛

哀愍覆護我 令法種增長 此世及後生

願佛常攝受

願共諸眾生 往生安樂國

南無至心歸命禮西方極樂世界觀世音菩薩

願共諸眾生 往生安樂國

南無至心歸命禮西方極樂世界大勢至菩薩

願共諸眾生 往生安樂國

南無至心歸命禮西方極樂世界諸菩薩清淨大海

眾

願共諸眾生 往生安樂國

普爲師僧父母及善知識法界眾生斷除三障同得
往生阿彌陀佛國歸命懺悔

讚阿彌陀佛偈

護所研究存卷

二

--	--	--	--	--	--	--	--	--	--	--

無量壽經優婆提舍願生偈註卷上

魏永寧寺北天竺沙門菩提流支譯論

魏西河石壁谷玄中寺沙門曇鸞註解

無量壽經優婆提舍願生偈 婆數槃頭菩薩造

謹案龍樹菩薩十住毗婆沙云。菩薩求阿毗跋致。

有二種道。一者難行道。二者易行道。難行道者謂

於五濁之世。於無佛時。求阿毗跋致。爲難。此難乃

有多途。麤言五三。以示義意。一者外道相修勝善。

亂菩薩法。二者聲聞自利。障大慈悲。三者無賴惡

人。破他勝德。四者顛倒善果。能壞梵行。五者唯是

自力無他力持。如斯等事。觸目皆是。譬如陸路。步行則苦。易行道者。謂但以信佛因緣。願生淨土。乘佛願力。便得往生彼清淨土。佛力住持。卽入大乘。正定之聚。正定卽是阿毗跋致。譬如水路。乘船則樂。此無量壽經。優婆提舍。蓋上行之極致。不退之風航者也。無量壽是安樂淨土。如來別號。釋迦牟尼佛。在王舍城及舍衛國。於大眾之中。說無量壽佛莊嚴功德。卽以佛名號爲經體。後聖者。婆藪槃頭菩薩。服膺一升反如來大悲之教。傍經作願生偈。復造長行重釋。梵言優婆提舍。此間無正名相譯。

若舉一隅。可名爲論。所以無正名譯者。以此間本無佛故。如此間書就孔子而稱經。餘人製作。皆名爲子。國史國紀之徒。各別體例。然佛所說十二部經中。有論議經。名優婆提舍。若復佛諸弟子解佛經教。與佛義相應者。佛亦許名優婆提舍。以入佛法相故。此間云論。直是論議而已。豈得正譯彼名耶。又如女人。於子稱母。於兄云妹。如是等事。皆隨義各別。若但以女名汎談母妹。乃不失女之大體。豈含尊卑之義乎。此所云論。亦復如是。是以仍因反蒸存梵音。曰優婆提舍。此論始終凡有二重。一是

總說分。二是解義分。總說分者前五言偈盡是解義分者論曰已下長行盡是。所以爲二重者有二義。偈以頌經爲總攝。故論以釋偈爲解義。故無量壽者言無量壽如來壽命長遠不可思量也。經者常也。言安樂國土。佛及菩薩清淨莊嚴功德。國土清淨莊嚴功德。能與眾生作大饒益。可常行於世。故名曰經。優婆提舍是佛論議經名。願是欲樂義。生者天親菩薩願生彼安樂淨土如來淨華中生。故曰願生。偈是句數義。以五言句略頌佛經。故名爲偈。譯婆藪云天。譯槃頭言親。此人字天親。事在

付法藏經菩薩者。若具存梵音。應言菩提薩埵。菩提者是佛道名。薩埵或云眾生。或云勇健。求佛道眾生。有勇猛健志。故名菩提薩埵。今但言菩薩。譯者略耳。造亦作也。庶因人重法。故云某造。是故言無量壽經優婆提舍願生偈。婆敷槃頭菩薩造。解論名目竟。

△偈中分爲五念門。如下長行所釋。第一行四句偈。含有三念門。上三句是禮拜讚歎門。下一句是作願門。第二行論主自述。我依佛經造論。與佛教相應。所服有宗。何故云此。爲成優婆提舍名故。亦是

成上三門。起下二門。所以次之說。從第三行盡二
十三行是觀察門。末後一行是迴向門。分偈章門
竟。

世尊我一心

歸命盡十方

無礙光如來

願生安樂國

世尊者。諸佛通號。論智則義無不達。語斷則習氣
無餘。智斷具足。能利世間。爲世尊重。故曰世尊。此
言意歸釋迦如來。何以得知。下句言我依脩多羅。
天親菩薩在釋迦如來像法之中。順釋迦如來經
教。所以願生。願生有宗。故知此言歸於釋迦。若謂

此意徧告諸佛。亦復無嫌。夫菩薩歸佛。如孝子之歸父母。忠臣之歸君后。動靜非己。出沒必由。知恩報德。理宜先啟。又所願不輕。若如來不加威神。將何以達。乞加神力。所以仰告。我一心者。天親菩薩自督之詞。言念無礙光如來。願生安樂。心心相續。無他想間雜。問曰。佛法中無我。此中何以稱我。答曰。言我有三根本。一是邪見語。二是自大語。三是流布語。今言我者。天親菩薩自指之言。用流布語。非邪見自大也。歸命盡十方無礙光如來者。歸命。卽是禮拜門。盡十方無礙光如來。卽是讚歎門。何

以知歸命是禮拜。龍樹菩薩造阿彌陀如來讚中。或言稽首禮。或言我歸命。或言歸命禮。此論長行中。亦言修五念門。五念門中。禮拜是一。天親菩薩既願往生。豈容不禮。故知歸命卽是禮拜。然禮拜但是恭敬。不必歸命。歸命必是禮拜。若以此推。歸命爲重。偈申己心。宜言歸命。論解偈義。汎談禮拜。彼此相成。於義彌顯。何以知盡十方無礙光如來。是讚歎門。下長行中言。云何讚歎門。謂稱彼如來名。如彼如來。光明智相。如彼名義。欲如實修行相應故。依舍衛國所說無量壽經。佛解阿彌陀如來

名號。何故號阿彌陀。彼佛光明無量。照十方國。無所障礙。是故號阿彌陀。又彼佛壽命及其人民。無量無邊阿僧祇劫。故名阿彌陀。問曰。若言無礙光。如來光明無量。照十方國土。無所障礙者。此問眾生。何以不蒙光照。光有所不照。豈非有礙耶。答曰。礙屬眾生。非光礙也。譬如日光周四天下。而盲者不見。非日光不周也。亦如密雲洪澤。灌之而頑石不潤。非雨不洽。洽。下。洽反。也。若言一佛主領三千大千世界。是聲聞論中說。若言諸佛徧領十方無量無邊世界。是大乘論中說。天親菩薩今言盡十方無

礙光如來。卽是依彼如來名。如彼如來光明智相讚歎。故知此句是讚歎門。願生安樂國者。此一句是作願門。天親菩薩歸命之意也。其安樂義具在下觀察門中。問曰。大乘經論中處處說眾生畢竟無生如虛空。云何天親菩薩言願生耶。答曰。說眾生無生如虛空有二種。一者如凡夫所謂實眾生。如凡夫所見實生死。此所見事。畢竟無所有。如龜毛。如虛空。二者謂諸法因緣生故。卽是不生。無所有。如虛空。天親菩薩所願生者。是因緣義。因緣義故。假名生。非如凡夫謂有實眾生實生死也。問曰。

依何義說往生。答曰。於此間假名人中。修五念門。前念與後念作因。穢土假名人。淨土假名人。不得決定。不得決定異。前心後心亦復如是。何以故。若一則無因果。若異則非相續。是義觀一異門論中委曲釋。第一行三念門竟。

△次成優婆提舍名。又成上起下偈。

我依脩多羅

真實功德相

說願偈總持

與佛教相應

此一行云何成優婆提舍名。云何成上三門起下二門。偈言我依脩多羅與佛教相應。脩多羅是佛

經名。我論佛經義與經相應。以入佛法相故。得名優婆提舍名成竟。成上三門。起下二門。何所依。何故依。云何依。何所依者。依脩多羅。何故依者。以如來卽真實功德相故。云何依者。修五念門相應故。成上起下竟。脩多羅者。十二部經中直說者名脩多羅。謂四阿含三藏等。三藏外大乘諸經亦名脩多羅。此中言依脩多羅者。是三藏外大乘脩多羅。非阿含等經也。真實功德相者。有二種功德。一者從有漏心生。不順法性。所謂凡夫人天諸善人天果報。若因若果。皆是顛倒。皆是虛僞。是故名不實。

功德二者從菩薩智慧清淨業起莊嚴佛事依法性入清淨相。是法不顛倒。不虛僞。名爲真實功德。云何不顛倒。依法性順二諦故。云何不虛僞。攝眾生入畢竟淨故。說願偈。總持與佛教相應者。持名不散不失。總名以少攝多。偈言五言句數。願名欲樂往生。說謂說諸偈論。總而言之。說所願生偈。總持佛經與佛教相應。相應者譬如函蓋相稱也。

觀彼世界相 勝過三界道

此已下是第四觀察門。此門中分爲二別。一者觀察器世間莊嚴成就。二者觀察眾生世間莊嚴成

就此句已下。至願生彼阿彌陀佛國。是觀器世間。莊嚴成就。觀器世間中。復分為十七別。至文當日。此二句。即是第一事。名為觀察莊嚴清淨功德。成就此清淨是總相。佛本所以起此莊嚴清淨功德者。見三界是虛偽相。是輪轉相。是無窮相。如蚘尺音。蠖屈伸蟲。一郭反。循環如蠶才含。蠶衣。公殄反。自縛哀哉。眾生結不解。帝音。此三界顛倒不淨。欲置眾生於不虛偽處。於不輪轉處。於不無窮處。得畢竟安樂。大清淨處。是故起此清淨莊嚴功德也。成就者言此清淨。不可破壞。不可汙染。非如三界是汙染相。是破

壞相也。觀者觀察也。彼者彼安樂國也。世界相者。彼安樂世界清淨相也。其相別在下。勝過三界。道者通也。以如此因得如此果。以如此果酬如此因。通因至果。通果酬因。故名爲道。三界者。一是欲界。所謂六欲天。四天下。人畜生餓鬼地獄等是也。二是色界。所謂初禪二禪三禪四禪天等是也。三是無色界。所謂空處識處無所有處非想非非想處天等是也。此三界蓋是生死凡夫流轉之閻宅。雖復苦樂小殊。脩短暫異。統而觀之。莫非有漏。倚伏相乘。循環無際。雜生觸受。四倒長拘。且因且果。

虛偽相襲。安樂是菩薩慈悲正觀之由生。如來神力本願之所建。胎卵溼生。緣茲高揖。業繫長維。從此永斷。續括之權。不待勸而彎弓。勞謙善讓。齊普賢而同德。勝過三界。抑是近言。

究竟如虛空 廣大無邊際

此二句。名莊嚴量功德成就。佛本所以起此莊嚴

量功德者。見三界狹戶甲反。小墮敗城阜。或垂反。陁山絕坎。形音

陪重土。一曰滿。文才反。階如渚者。丘之與反。或宮觀迫伯音。迮子格反。或

土田逼隘陋。已賣反。或志求路促。或山河隔塞。公厄反。障。或

國界分部。有如此等種種拘局事。是故菩薩興此

莊嚴量功德。願我國土如虛空。廣大無際。如虛空者。言來生者。雖眾猶若無也。廣大無際者。成上如虛空義。何故如虛空。以廣大無際故。成就者。言十方眾生往生者。若已生。若今生。若當生。雖無量無邊。畢竟常如虛空。廣大無際。終無滿時。是故言究竟如虛空。廣大無邊際。問曰。如維摩方丈。包容有餘。何必國界無貲。子支反乃稱廣大。答曰。所言廣大。非必以畦。五十畝。三寸畝。一萬反。下圭反。曉遠。爲喻。但言如空。亦何累方丈。又方丈之所包容。在狹而廣。覈實。下革反。論果報。豈若在廣而廣耶。

正道大慈悲 出世善根生

此二句名莊嚴性功德成就。佛本何故起此莊嚴見有國土。以愛欲故。則有欲界。以攀厭禪定故。則有色無色界。此三界皆是有漏邪道所生。長寢大夢。莫知惺出。是故興大悲心。願我成佛。以無上正見道起清淨土。出於三界。性是本義。言此淨土隨順法性。不乖法本。事同華嚴經寶王如來性起義。又言積習成性。指法藏菩薩集諸波羅蜜積習所成。亦言性者。是聖種性。序法藏菩薩於世自在。王佛所悟無生法忍。爾時位名聖種性。於是性中發

四十八大願。修起此土。卽曰安樂淨土。是彼因所得。果中說因。故名爲性。又言性是必然義。不改義。如海性一味。衆流入者必爲一味。海味不隨彼改也。又如人身性不淨。故種種妙好色香美味。入身皆爲不淨。安樂淨土諸往生者。無不淨色。無不淨心。畢竟皆得清淨平等。無爲法身。以安樂國土清淨性成就故。正道大慈悲。出世善根生者。平等大道也。平等道所以名爲正道者。平等是諸法體相。以諸法平等。故發心等。發心等。故道等。道等。故大慈悲等。大慈悲是佛道正因。故言正道大慈悲。慈

悲有三緣。一者眾生緣。是小悲。二者法緣。是中悲。三者無緣。是大悲。大悲卽出世善也。安樂淨土。從此大悲生故。故謂此大悲爲淨土之根。故曰出世善根生。

淨光明滿足

如鏡日月輪

此二句名莊嚴形相功德成就。佛本所以起此莊嚴功德者。見日行四域。光不周三方。庭燎力小反在。宅明不滿十仞。以是故起滿淨光明。願如日月光輪。滿足自體。彼安樂淨土。雖復廣大無邊。清淨光明。無不充塞。故曰淨光明滿足。如鏡日月輪。

備諸珍寶性

具足妙莊嚴

此二句名莊嚴種種事功德成就。佛本何故起此莊嚴。見有國土以泥土爲宮飾。以木石爲華觀。或彫金鏤玉。意願不充。或營備百千具。受辛苦。以此故興大悲心。願我成佛。必使珍寶具足。嚴麗自然。相忘於有餘。自得於佛道。此莊嚴事。縱使毗首羯磨工稱妙絕。積思竭想。豈能取圖。性者本義也。能生既淨。所生焉得不淨。故經言。隨其心淨。則佛土淨。是故言。備諸珍寶性。具足妙莊嚴。

無垢光燄熾

明淨曜世間

此二句名莊嚴妙色功德成就。佛本何故起此莊嚴。見有國土優劣不同。以不同故。高下以形。高下既形。是非以起。是非既起。長淪沒倫音。三有是故。興大悲心。起平等願。願我國土光燄熾盛。第一無比。不如人天金色。能有奪者。若爲相奪。如明鏡在。金邊則不現。今日時中金。比佛在時金。則不現。佛在時金。比閻浮那金。則不現。閻浮那金。比大海中轉輪王道中金沙。則不現。轉輪王道中金沙。比金山。則不現。金山。比須彌山金。則不現。須彌山金。比三十三天瓔珞金。則不現。三十三天瓔珞金。比餽摩

天金則不現。餒摩天金比兜率陀。天金則不現。兜率陀天金比化自在。天金則不現。化自在天金比他化自在。天金則不現。他化自在天金比安樂國中。光明則不現。所以者何。彼土金光從絕垢業生故。清淨無成就故。安樂淨土是無生忍菩薩淨業所起。阿彌陀如來法王所領。阿彌陀如來爲增上緣故。是故言無垢光餒熾明淨。曜世間。曜世間者。曜二種世間也。

寶性功德草

柔輭左右旋

觸者生勝樂

過迦旃鄰陀

此四句名莊嚴觸功德成就。佛本何故起此莊嚴。見有國土。雖寶重金玉。不得為衣服。珍玩明鏡。無議於數具。斯緣悅於目。不便於身也。身眼二情。豈弗矛盾乎。是故願言使我國土。人天六情。和於水乳。卒去楚越之勞。所以七寶柔輒。悅目便身。迦旃鄰陀者。天竺柔輒草名也。觸之者能生樂受。故以為喻。註者言。此間土石草木。各有定體。譯者何緣目彼寶為草耶。當以其葦。草得風貌。父蟲反。茸藜。草旋貌。一莞反。苳。細草曰苳。亡小反。故以草目之耳。余若參譯。當別有途。生勝樂者。觸迦旃鄰陀。生染著樂。觸彼輒寶。生法

喜樂。二事相懸。非勝如何。是故言寶性功德草。柔
輒左右旋。觸者生勝樂。過迦旃鄰陀。

寶華千萬種

彌覆池流泉

微風動華葉

交錯光亂轉

此四句名莊嚴水功德成就。佛本何故起此願。見

有國土。或澗

音云溺

謂江水大波

洪濤

大海波

滓沫驚

人。或凝澌

流冰上

澂

古甲反

凜

凍相著

蹙

迫子

枷懷

恎。失常。他則反

向無安悅之情。背有恐值之慮。菩薩見

此。興大悲心。願我成佛。所有流泉池沼。

池之小反

與宮

殿相稱。

事出經中

種種寶華。布為水飾。微風徐扇。映發

有序開神悅體無一不可。是故言寶華千萬種。彌覆池流泉微風動華葉交錯光亂轉。

宮殿諸樓閣

觀十方無礙

雜樹異光色

寶欄徧圍繞

此四句名莊嚴地功德成就佛本何故起此莊嚴。

見有國土。嶠高貌。才消反。嶢牛消反。峻高俊音。嶺枯木橫岑。

峯才白反。峒山不齊貌。五百反。峿深山谷。亦山形音。嶙深無崖。力人反。脊

惡草貌。茅道多草。不可消音。盈壑茫茫滄海為絕目之

川葦蕪廣澤為無蹤之所。菩薩見此興大悲願。願

我國土地平如掌。宮殿樓閣鏡納十方的無所屬

亦非不屬寶樹寶欄互為映飾是故言宮殿諸樓閣觀十方無礙雜樹異光色寶欄徧圍繞。

無量寶交絡

羅網徧虛空

種種鈴發響

宣吐妙法音

此四句名莊嚴虛空功德成就佛本何故起此莊

嚴見有國土煙雲塵霧蔽障太虛震烈霽雨聲。土反。

霽大雨下。郭反。從上而墮不祥哉天火葬。才反。寬屈虹青赤。或白色陰。

氣五結反。每自空來憂慮百端為之毛豎菩薩見此興

大悲心願我國土寶網交絡羅徧虛空鈴鐸大鈴。大各。

反。宮商鳴宣道法視之無厭懷道見德是故言無

量寶交絡羅網徧虛空。種種鈴發響。宣吐妙法音。
雨華衣莊嚴。無量香普熏。

此二句名莊嚴雨功德成就。佛本何故興此莊嚴。見有國土欲以服飾布地。延請所尊。或欲以香華名寶。用表恭敬。而業貧感薄。是事不果。是故興大悲願。願我國土常雨此物。滿眾生意。何故以雨爲言。恐取著云。若常雨華衣。亦應填塞虛空。何緣不妨。是故以雨爲喻。雨適時則無洪滔。水漫大他高反之患。安樂報豈有累情之物乎。經言。日夜六時雨寶衣。雨寶華。寶質柔軟。履踐其上。則下四寸。隨舉足時。

還復如故。用訖入寶地。如水入坎。是故言雨華衣莊嚴無量香普熏。

佛慧明淨日 除世癡闇冥

此二句名莊嚴光明功德成就。佛本何故興此莊嚴。見有國土。雖復頂背日光。而爲愚癡所闇。是故願言。使我國土所有光明。能除癡闇。入佛智慧。不爲無記之事。亦云安樂國土光明。從如來智慧報起。故能除世闇冥。經言。或有佛土。以光明爲佛事。卽是此也。故言佛慧明淨日。除世癡闇冥。

梵聲悟深遠 微妙聞十方

此二句名莊嚴妙聲功德成就。佛本何故興此願。見有國土雖有善法而名聲不遠。有名聲雖遠復不微妙。有名聲妙遠復不能悟物。是故起此莊嚴天竺國稱淨行爲梵行。稱妙辭爲梵言。彼國貴重梵天。多以梵爲讚。亦言中國法與梵天通故也。聲者名也。名謂安樂土名。經言若人但聞安樂淨土之名。欲願往生。亦得如願。此名悟物之證也。釋論言如斯淨土。非三界所攝。何以言之。無欲故。非欲界。地居故。非色界。有色故。非無色界。蓋菩薩別業所致耳。出有而有曰微。出有者。謂出三有。而有者。謂淨土有也。名能

如來淨華眾 正覺華化生

此二句名莊嚴眷屬功德成就。佛本何故興此願。

見有國土或以胞血為身器。或以糞尿為生元。或

槐棘高圻出猜狂之子。或豎子婢腹出卓犖零角反

之才。譏諷反由之懷火。恥辱緣以抱冰。所以願

言。使我國土悉於如來淨華中生。眷屬平等與奪

無路。故言如來淨華眾。正覺華化生。

愛樂佛法味 禪三昧為食

此二句名莊嚴受用功德成就。佛本何故興此願。

見有國土。或採巢破卵為饑盛食滿貌。饒飽也。多亡公反。消

反之。饑或懸沙指帛爲相慰之方。嗚呼諸子。實可痛心。是故興大悲願。願我國土。以佛法以禪定。以三昧爲食。永絕他食之勞。愛樂佛法味者。如日月燈明。佛說法華經。六十小劫。時會聽者。亦坐一處。六十小劫。謂如食頃。無有一人若身若心而生懈怠。以禪定爲食者。謂諸大菩薩。常在三昧。無他食也。三昧者。彼諸人天。若須食時。百味嘉餚。羅列在前。眼見色。鼻聞香。身受適悅。自然飽足。訖已化去。若須復現。其事在經。是故言愛樂佛法味。禪三昧爲食。

永離身心惱

受樂常無間

此二句名莊嚴無諸難功德成就。佛本何故興此願。見有國土。或朝預袞寵。夕惶斧鉞。或幼舍蓬藜。長列方丈。或鳴笳道出。歷經催還。有如是等種種違奪。是故願言。使我國土安樂相續。畢竟無間。身心惱者。飢渴寒熱殺害等也。心惱者。是非得失三毒等也。是故言永離身心惱。受樂常無間。

大乘善根界

等無譏嫌名

女人及根缺

二乘種不生

此四句名莊嚴大義門功德成就。門者。通大義之

門也。大義者。大乘所以也。如人造城。得門則入。若人得生安樂者。是則成就大乘之門也。佛本何故興此願。見有國土。雖有佛如來賢聖等眾。由國濁故。分一說三。或以拓聽各反眉致誚。或緣指語招譏。是故願言使我國土。皆是大乘一味。平等一味。根敗種子。畢竟不生。女人殘缺。名字亦斷。是故言大乘善根界等無譏嫌名。女人及根缺。二乘種不生。問曰。秦王舍城所說無量壽經。法藏菩薩四十八願中言。設我得佛。國中聲聞。有能計量知其數者。不取正覺。是有聲聞一證也。又十住毗婆沙中。龍

樹菩薩造阿彌陀讚云。超出三界獄。目如蓮華葉。聲聞眾無量。是故稽首禮。是有聲聞二證也。又摩訶衍論中言。佛土種種不同。或有佛土純是聲聞僧。或有佛土純是菩薩僧。或有佛土菩薩聲聞會爲僧。如阿彌陀安樂國等是也。是有聲聞三證也。諸經中有說安樂國處。多言有聲聞。不言無聲聞。聲聞卽是二乘之一。論言乃至無二乘名。此云何會。答曰。以理推之。安樂淨土不應有二乘。何以言之。夫有病則有藥。理數之常也。法華經言。釋迦牟尼如來。以出五濁世故。分一爲三。淨土旣非五濁。

無三乘明矣。法華經導諸聲聞是人於何而得解脫。但離虛妄。名爲解脫。是人實未得一切解脫。以未得無上道故。覈推此理。阿羅漢旣未得一切解脫。必應有生。此人更不生三界。三界外除淨土更無生處。是以唯應於淨土生。如言聲聞者是他方聲聞來生。仍本名故。稱爲聲聞。如天帝釋生人中時。姓憍尸迦。後雖爲天主。佛欲使人知其由來。與帝釋語時。猶稱憍尸迦。其此類也。又此論但言二乘種不生。謂安樂國不生二乘種子。亦何妨二乘來生耶。譬如橘栽不生江北。河洛果肆亦見有橘。

又言鸚鵡不渡隴西。趙魏架桁亦有鸚鵡。此二物但言其種不渡。彼有聲聞亦如是。作如是解。經論則會。問曰。名以召事。有事乃有名。安樂國旣無二乘。女人根缺之事。亦何須復言無此三名耶。答曰。如軟心菩薩不甚勇猛。譏言聲聞。如人諂曲。或復懦弱。譏言女人。又如眼雖明而不識事。譏言盲人。又如耳雖聰而聽義不解。譏言聾人。又如舌雖語而訥口。噤吃。譏言瘖人。有如是等根。雖具足。而有譏嫌之名。是故須言乃至無名。明淨土無如是等與奪之名。問曰。尋法藏菩薩本願。及龍樹菩薩所

讚皆似以彼國聲聞眾多爲奇。此有何義。答曰。聲聞以實際爲證。計不應更能生佛道根芽。而佛以本願不可思議神力。攝令生彼。必當復以神力。生其無上道心。譬如鴟鳥入水。魚蚌咸死。犀牛觸之。死者皆活。如此不應生而生。所以可奇。然五不思議中。佛法最不可思議。佛能使聲聞復生無上道心。真不可思議之至也。

眾生所願樂 一切能滿足

此二句名莊嚴一切所求滿足功德成就。佛本何故與此願。見有國土。或名高位重。潛處無由。或人

凡姓鄙。悒出靡路。或脩短繫業。制不在己。如阿私陀仙人類也。有如是等爲業風所吹。不得自在。是故願言使我國土各稱所求。滿足情願。是故言。眾生所願樂。一切能滿足。

是故願生彼 阿彌陀佛國

此二句。結成上觀察十七種莊嚴國土成就。所以願生。釋器世間清淨。訖之於上。

△次觀眾生世間清淨。此門中分爲二別。一者觀察阿彌陀如來莊嚴功德。二者觀察彼諸菩薩莊嚴功德。觀察如來莊嚴功德中有八種。至文當目。問

曰。有論師汎解眾生名義。以其輪轉三有。受眾多
生死。故名眾生。今名佛菩薩爲眾生。是義云何。答
曰。經言一法有無量名。一名有無量義。如以受眾
多生死。故名爲眾生者。此是小乘法釋三界中眾
生名義。非大乘法眾生名義也。大乘法所言眾生
者。如不增不減。經言。言眾生者。卽是不生不滅義。
何以故。若有生。生已復生。有無窮過故。有不生而
生過故。是故無生。若有生。可有滅。旣無生。何得有
滅。是故無生無滅。是眾生義。如經中言。五受陰通
達空無所有。是苦義。斯其類也。

無量大寶王

微妙淨華臺

此二句名莊嚴座功德成就佛本何故莊嚴此座。見有菩薩於末後身敷草而坐。成阿耨多羅三藐三菩提。人天見者不生增上信。增上恭敬。增上愛樂。增上修行。是故願言。我成佛時。使無量大寶王。微妙淨華臺。以爲佛座。無量者。如觀無量壽經言。七寶地上有大寶蓮華王座。蓮華一一葉作百寶色。有八萬四千脈。猶如天畫。脈有八萬四千光。華葉小者。縱廣二百五十由旬。如是華有八萬四千葉。一一葉間。有百億摩尼珠王。以爲映飾。一一摩

尼放千光明。其光如蓋。七寶合成。徧覆地上。釋迦毗楞伽寶以爲其臺。此蓮華臺。八萬金剛甄叔迦寶。梵摩尼寶。妙眞珠網。以爲校飾。於其臺上。自然而有四柱寶幢。一一寶幢。如百千萬億須彌山。幢上寶幔。如夜摩天宮。有五百億微妙寶珠。以爲映飾。一一寶珠。有八萬四千光。一一光。作八萬四千異種金色。一一金色。徧安樂寶土。處處變化。各作異相。或爲金剛臺。或作眞珠網。或作雜華雲。於十方面。隨意變現。施作佛事。如是等事。出過數量。是故言無量大寶王。微妙淨華臺。

相好光一尋 色像超羣生

此二句名莊嚴身業功德成就。佛本何故莊嚴如此身業。見有佛身受一文光明於人身光不甚超絕。如轉輪王相好亦大同。提婆達多所滅唯二。致令阿闍世王以茲惑亂。刪闍耶等敢如螳螂或如此類也。是故莊嚴如此身業。案此間詰訓。六尺曰尋。如觀無量壽經言。阿彌陀如來身高六十萬億那由他恆河沙由旬。佛圓光如百億三千大千世界。譯者以尋而言。何其晦阿內乎。里舍間人。不簡縱橫長短。咸謂橫舒兩手臂爲尋。若譯者或取此

類用準阿彌陀如來舒臂爲言。故稱一尋者。圓光亦應徑六十萬億那由他恆河沙由旬。是故言相好光一尋。色像超羣生。問曰。觀無量壽經言。諸佛如來是法界身。入一切眾生心想中。是故汝等心想佛時。是心卽是三十二相八十隨形好。是心作佛。是心是佛。諸佛正徧知海。從心想生。是義云何。答曰。身名集成。界名事別。如眼界緣根色空明作意。五因緣生。名爲眼界。是眼但自行已緣。不行他緣。以事別故。耳鼻等界亦如是。言諸佛如來是法界身者。法界是眾生心法也。以心能生世間出世

問一切諸法故名心爲法界。法界能生諸如來相好身。亦如色等能生眼識。是故佛身名法界身。是身不行他緣。是故入一切眾生心想中。心想佛時。是心卽是三十二相八十隨形好者。當眾生心想佛時。佛身相好顯現。眾生心中也。譬如水清則色像現。水之與像。不一不異。故言佛相好身卽是心想也。是心作佛者。言心能作佛也。是心是佛者。心外無佛也。譬如火從木出。火不能離木也。以不離木故則能燒木。木爲火燒。木卽爲火也。諸佛正徧知海。從心想生者。正徧知者。真正如法界而知也。

法界無相。故諸佛無知也。以無知。故無不知也。無知而知者。是正徧知也。是知深廣不可測量。故譬海也。

如來微妙聲

梵響聞十方

此二句名莊嚴口業功德成就。佛本何故與此莊嚴。見有如來。名似不尊。如外道推車人。稱瞿

豕反

人。稱瞿

曇姓。成道日聲。唯徹梵天。是故願言。使我成佛。妙聲遐布。聞者悟忍。是故言。如來微妙聲。梵響聞十方。

同地水火風

虛空無分別

此二句名莊嚴心業功德成就。佛本何故與此莊嚴。見有如來說法云。此黑此白。此不黑不白。下法中法上法上上法。有如是等無量差別品。似有分別。是故願言。使我成佛。如地荷負。無輕重之殊。如水潤長。無荷惡草菴瑞草之異。如火成熟。無芳臭之別。如風起發。無眠寤之差。如空苞受。無開塞之念。得之於內。物安於外。虛往實歸。於是乎息。是故言同地水火風虛空無分別。於是乎息疑是功用皆息

天人不動眾

清淨智海生

此二句名莊嚴大眾功德成就。佛本何故起此莊

嚴見有如來說法輪下。所有大眾諸根性欲種種不同。於佛智慧。若退若沒。以不等故。眾不純淨。所以興願願我成佛。所有天人皆從如來智慧清淨海生。海者言佛一切種智深廣無涯。不宿二乘雜善中。下死屍喻之如海。是故言天人不動。眾清淨智海生。不動者言彼天人成就大乘根。不可傾動也。

如須彌山王

勝妙無過者

此二句名莊嚴上首功德成就。佛本何故起此願見有如來眾中或有強梁者。如提婆達多流比。或

有國王與佛並治。不知甚推佛。或有請佛。以他緣廢忘。有如是等。似上首力不成就。是故願言。我爲佛時。願一切大眾。無能生心。敢與我等。唯一法王。更無俗王。是故言。如須彌山王。勝妙無過者。

天人丈夫眾

恭敬繞瞻仰

此二句名莊嚴主功德成就。佛本何故起此莊嚴。見有佛如來。雖有大眾。眾中亦有不甚恭敬。如一比丘語釋迦牟尼佛。若不與我解十四難。我當更學餘道。亦如居迦離。謗舍利弗。佛三語而三不受。又如諸外道輩。假入佛眾。而常伺求佛短。又如第

六天魔常於佛所作諸留難。有如是等種種不恭敬相。是故願言。使我成佛。天人大眾恭敬無倦。所以但言天人者。淨土無女人及八部鬼神故也。是故言天人丈夫眾。恭敬繞瞻仰。

觀佛本願力

遇無空過者

能令速滿足

功德大寶海

此四句名莊嚴不虛作住持功德成就。佛本何故起此莊嚴。見有如來。但以聲聞爲僧。無求佛道者。或有值佛而不免三塗。善星提婆達多。居迦離等是也。又人聞佛名號。發無上道心。遇惡因緣。退入

聲聞辟支佛地者。有如是等空過者。退沒者。是故願言。使我成佛時。值遇我者。皆速疾滿足。無上大寶。是故言觀佛本願力。遇無空過者。能令速滿足。功德大寶海。住持義如上。觀佛莊嚴八種功德。訖之於上。

△次觀安樂國諸大菩薩四種莊嚴功德成就。問曰。觀如來莊嚴功德。何所闕少。復須觀菩薩功德耶。答曰。如有明君。則有賢臣。堯舜之稱。無爲是其比也。若使但有如來法王。而無大菩薩法臣。於翼贊道。豈足云滿。亦如薪積。小則火不大。如經言。阿彌

陀佛國。有無量無邊諸大菩薩。如觀世音。大勢至等。皆當一生於他方。次補佛處。若人稱名憶念者。歸依者。觀察者。如法華經普門品說。無願不滿。然菩薩愛樂功德。如海吞流。無止足情。亦如釋迦牟尼如來。聞一目闍比丘呬言。誰愛功德。爲我維鍼。爾時如來從禪定起來。到其所。語言。我愛福德。遂爲其維鍼。爾時失明比丘暗聞佛語聲。驚喜交集。白佛言。世尊。世尊功德猶未滿耶。佛報言。我功德圓滿。無所復須。但我此身從功德生。知功德恩分故。是故言愛。如所問觀佛功德。實無願不充。所以

復觀菩薩功德者。有如上種種義故耳。

安樂國清淨

常轉無垢輪

化佛菩薩日

如須彌住持

佛本何故起此莊嚴。見有佛土。但是小菩薩不能於十方世界廣作佛事。或但聲聞人天所利狹小。是故興願。願我國中有無量大菩薩眾。不動本處。徧至十方。種種應化。如實修行。常作佛事。譬如日在天上。而影現百川。日豈來耶。豈不來耶。如大集經言。譬如有人善治堤塘。量其所宜。及放水時。不加心力。菩薩亦如是。先治一切諸佛及眾生應供。

養應教化種種堤塘。及入三昧。身心不動。如實修行。常作佛事。如實修行者。雖常修行。實無所修行也。是故言安樂國清淨。常轉無垢輪。化佛菩薩。日如須彌住持。

無垢莊嚴光

一念及一時

普照諸佛會

利益諸羣生

佛本何故起此莊嚴。見有如來眷屬。欲供養他。方無量諸佛。或欲教化無量眾生。此沒彼出。先南後北。不能以一念一時。放光普照。徧至十方世界。教化眾生。有出沒前後相故。是故興願。願我佛土諸

大菩薩於一念時。遍至十方。作種種佛事。是故言。無垢莊嚴光。一念及一時。普照諸佛會。利益諸羣生。問曰。上章云。身不動搖。而遍至十方。不動而至。豈非是一時義耶。與此若爲差別。答曰。上但言不動而至。或容有前後。此言無前無後。是爲差別。亦是成上不動義。若不一時。則是往來。若有往來。則非不動。是故爲成上不動義。故須觀一時。

雨天樂華衣

妙香等供養

讚諸佛功德

無有分別心

佛本何故起此莊嚴。見有佛土。菩薩人天志趣不

廣不能徧至十方無窮世界。供養諸佛如來大眾。或以己土穢濁。不敢向詣淨鄉。或以所居清淨。鄙薄穢土。以如此等種種局分。於諸佛如來所不能周徧供養。發起廣大善根。是故願言。我成佛時。願我國土一切菩薩。聲聞天人。大眾徧至十方一切諸佛大會處所。雨天樂天華天衣天香。以巧妙辯辭。供養讚歎諸佛功德。雖歎穢土如來大慈謙忍。不見佛土有雜穢相。雖歎淨土如來無量莊嚴。不見佛土有清淨相。何以故。以諸法等故。諸如來等。是故諸佛如來名爲等覺。若於佛土起優劣心。假

使供養如來。非法供養也。是故言雨天樂華衣妙香等供養。讚諸佛功德。無有分別心。

何等世界無

佛法功德寶

我願皆往生

示佛法如佛

佛本何故起此願。見有輒心菩薩。但樂有佛國土修行。無慈悲堅牢心。是故興願。願我成佛時。我土菩薩。皆慈悲勇猛堅固志願。能捨清淨土。至他方無佛法僧處。住持莊嚴佛法僧寶。示如有佛。使佛種處處不斷。是故言。何等世界無佛法功德寶。我願皆往生。示佛法如佛。觀菩薩四種莊嚴功德成。

就訖之於上。

△次下四句。是迴向門。

我作論說偈

願見彌陀佛

普共諸眾生

往生安樂國

此四句。是論主迴向門。迴向者。迴已功德。普施眾生。共見阿彌陀如來。生安樂國。

無量壽脩多羅章句。我以偈頌總說竟。

問曰。天親菩薩迴向章中。言普共諸眾生。往生安樂國。此指共何等眾生耶。答曰。案王舍城所說無量壽經。佛告阿難。十方恆河沙諸佛如來。皆共稱

歎無量壽佛威神功德不可思議。諸有眾生聞其名號。信心歡喜。乃至一念。至心迴向。願生彼國。卽得往生。住不退轉。唯除五逆。誹謗正法。案此而言。一切外凡夫人。皆得往生。又如觀無量壽經。有九品往生。下下品生者。或有眾生。作不善業。五逆十惡。具諸不善。如此愚人。以惡業故。應墮惡道。經歷多劫。受苦無窮。如此愚人。臨命終時。遇善知識。種種安慰。爲說妙法。教令念佛。此人苦逼。不遑念佛。善友告言。汝若不能念者。應稱無量壽佛。如是至心。令聲不絕。具足十念。稱南無阿彌陀佛。稱佛名。

故於念念中除八十億劫生死之罪。命終之時見金蓮華猶如日輪住其人前。如一念頃卽得往生極樂世界。於蓮華中滿十二大劫蓮華方開。當以此消五逆罪也。觀世音大勢至以大悲音聲爲其廣說諸法實相除滅罪法。聞已歡喜應時卽發菩提之心。是名下品下生者。以此經證明知下品凡夫。但令不誹謗正法。信佛因緣。皆得往生。問曰。無量壽經言。願往生者。皆得往生。唯除五逆誹謗正法。觀無量壽經言。作五逆十惡。具諸不善。亦得往生。此二經云何會。答曰。一經以具二種重罪。一者五逆。二者

誹謗正法。以此二種罪故。所以不得往生。一經但言作十惡五逆等罪。不言誹謗正法。以不謗正法故。是故得生。問曰。假使一人具五逆罪而不誹謗正法。經許得生。復有一人但誹謗正法。而無五逆諸罪。願往生者。得生與否。答曰。但令誹謗正法。雖更無餘罪。必不得生。何以言之。經言。五逆罪人墮阿鼻大地獄中。具受一劫重罪。誹謗正法人墮阿鼻大地獄中。此劫若盡。復轉至他方阿鼻大地獄中。如是展轉經百千阿鼻大地獄。佛不記得出時節。以誹謗正法罪極重故。又正法者。卽是佛法。此

愚癡人既生誹謗。安有願生佛土之理。假使但貪彼土安樂。而願生者。亦如求非水之冰。無煙之火。豈有得理。問曰。何等相是誹謗正法。答曰。若言無佛無佛法。無菩薩無菩薩法。如是等見。若心自解。若從他受。其心決定。皆名誹謗正法。問曰。如是等計。但是己事。於眾生有何苦惱。踰於五逆重罪耶。答曰。若無諸佛菩薩說世間出世間善道教化眾生者。豈知有仁義禮智信耶。如是世間一切善法皆斷。出世間一切賢聖皆滅。汝但知五逆罪爲重。而不知五逆罪從無正法生。是故謗正法人其罪。

最重。問曰。業道經言。業道如秤。重者先牽。如觀無量壽經言。有人造五逆十惡。具諸不善。應墮惡道。經歷多劫。受無量苦。臨命終時。遇善知識。教稱南無阿彌陀佛。如是至心。令聲不絕。具足十念。便得往生安樂淨土。卽入大乘正定之聚。畢竟不退。與三塗諸苦永隔。先牽之義。於理如何。又曠劫已來。備造諸行。有漏之法。繫屬三界。但以十念念阿彌陀佛。便出三界。繫業之義。復欲云何。答曰。汝謂五逆十惡。繫業等爲重。以下品人。十念爲輕。應爲罪所牽。先墮地獄。繫在三界者。今當以義校量。輕

重之義。在心。在緣。在決定。不在時節。久近多少也。
云何在。心。彼造罪人。自依止。虛妄顛倒。見生。此十
念者。依善知識。方便安慰。聞實相法。生一實一虛。
豈得相比。譬如千歲闇室。光若暫至。即便明朗。闇
豈得言在室千歲。而不去耶。是名在心。云何在緣。
彼造罪人。自依止妄想心。依煩惱虛妄果報。眾生
生。此十念者。依止無上信心。依阿彌陀如來方便
莊嚴。真實清淨無量功德名號。生譬如有人被毒
箭所中。截筋破骨。聞滅除藥鼓。卽箭出毒除。首楞嚴經
言。譬如。有藥。名曰滅除。若鬪戰時。用以塗鼓。聞鼓
聲者。箭出毒除。菩薩摩訶薩。亦復如是。住首楞嚴

三昧。問其名者。三毒之箭。自然拔出。豈可得言彼箭深毒。厲聞鼓音。聲不能拔箭去毒耶。是名在緣。云何在決定。彼造罪人。依止有後心。有間心生。此十念者。依止無後心。無間心生。是名決定。校量三義。十念者。重重者。先牽能出三有。兩經一義耳。問曰。幾時名爲一念。答曰。百一生滅。名一刹那。六十刹那。名爲一念。此中云念者。不取此時節也。但言憶念阿彌陀佛。若總相。若別相。隨所觀緣。心無他想。十念相續。名爲十念。但稱名號。亦復如是。問曰。心若他緣。攝之令還。可知念之多少。但知多少。復非無間。若凝心注

想復依何可得記念之多少。答曰。經言十念者。明業事成辦耳。不必須知頭數也。如言螻蛄不識春秋。伊蟲豈知朱陽之節乎。知者言之耳。十念業成者。是亦通神者言之耳。但積念相續。不緣他事。便罷復何暇須知念之頭數也。若必須知。亦有方便。必須口授。不得題之筆點。

無量壽經優婆提舍願生偈註卷上

無量壽經優婆提舍願生偈註卷下

魏永寧寺北天竺沙門菩提留支譯論

魏西河石壁谷玄中寺沙門曇鸞註解

論曰

論曰已下。此是解義分。此分中義有十重。一者願
偈大意。二者起觀生信。三者觀行體相。四者淨入
願心。五者善巧攝化。六者離菩提障。七者順菩提
門。八者名義攝對。九者願事成就。十者利行滿足。
論者。議也。言議偈所以也。曰者。詞也。指下諸句。是
議釋偈詞也。故言論曰。

行身語意名一
二
△願偈大意者。

此願偈明何義。示現觀彼安樂世界。見阿彌陀如來。願生彼國故。

△起觀生信者。此分中又有二重。一者示五念力。二者出五念門。示五念力者。

云何觀。云何生信心。若善男子善女人。修五念門行。成就畢竟得生安樂國土。見彼阿彌陀佛。

△出五念門者

何等五念門。一者禮拜門。二者讚歎門。三者作願門。四者觀察門。五者迴向門。

門者入出義也。如人得門。則入出無礙。前四念是入安樂淨土門。後一念是出慈悲教化門。

云何禮拜。身業禮拜阿彌陀如來。應正徧知。

諸佛如來德有無量。德無量故。德號亦無量。若欲具談。紙筆不能載也。是以諸經或舉十名。或騰三號。蓋存至宗而已。豈此盡耶。所言三號。卽此如來。應正徧知也。如來者。如法相解。如法相說。如諸佛安隱道來。此佛亦如是來。更不去後有中。故名如來。應者。應供也。佛結使除。盡得一切智慧。應受一切天地眾生供養。故曰應也。正徧知者。知一切諸

法實不壞相。不增不減。云何不壞。心行處滅。言語道過。諸法如涅槃相不動。故名正徧知。無礙光義。如前偈中解。

爲生彼國意故。

何故言此。菩薩之法。常以晝三時。夜三時。禮十方一切諸佛。不必有願生意。今應常作願生意。故禮阿彌陀如來也。

云何讚歎。口業讚歎。

讚者讚揚也。歎者歌歎也。讚歎非口不宣。故曰口業也。

稱彼如來名。如彼如來光明智相。如彼名義。欲如實修行相應故。

稱彼如來名者。謂稱無礙光如來名也。如彼如來光明智相者。佛光明是智慧相也。此光明照十方世界。無有障礙。能除十方眾生無明黑闇。非如日月珠光。但破空穴中闇也。如彼名義。欲如實修行相應者。彼無礙光如來名號。能破眾生一切無明。能滿眾生一切志願。然有稱名憶念。而無明猶在。而不滿所願者。何者。由不如實修行。與名義不相應故也。云何爲不如實修行。與名義不相應。謂不

知如來是實相身。是爲物身。又有三種不相應。一者信心不淳。若存若亡。故二者信心不一。無決定。故三者信心不相續。餘念間故。此三句展轉相成。以信心不淳。故無決定。無決定。故念不相續。亦可念不相續。故不得決定。信不得決定。信。故心不淳。與此相違。名與實修行相應。是故論主建言。我一心。問曰。名爲法指。如指指月。若稱佛名號。便得滿願者。指月之指。應能破闇。若指月之指。不能破闇。稱佛名號。亦何能滿願耶。答曰。諸法萬差。不可一概有名卽法。有名異法。名卽法者。諸佛菩薩名號。

般若波羅蜜及陀羅尼章句。禁呪音辭等是也。如禁腫辭云。日出東方。乍赤乍黃等句。假使酉亥行禁。不關日出。而腫得差。亦如行師對陣。但一切齒中誦臨兵鬪者。皆陳列在前行。誦此九字。五兵之所不中。抱朴子謂之要道者也。又苦轉筋者。以木瓜對火熨之。則愈。復有人但呼木瓜名。亦愈。吾身得其效也。如斯近事。世間共知。況不可思議境界者乎。滅除藥塗鼓之喻。復是一事。此喻已彰於前。故不重引。有名異法者。如指指月等名也。

云何作願。心常作願。一心專念。畢竟往生安樂國土。

欲如實修行奢摩他故。

譯奢摩他曰止。止者止心一處不作惡也。此譯名乃不乖大意於義未滿。何以言之。如止心鼻端亦名爲止。不淨觀止貪。慈悲觀止瞋。因緣觀止癡。如是等亦名爲止。如人將行不行亦名爲止。是知止語浮漫。不正得奢摩他名也。如椿柘榆柳。雖皆名木。若但云木。安得榆柳耶。奢摩他云止者。今有三義。一者一心專念阿彌陀如來。願生彼土。此如來名號及彼國土名號能止一切惡。二者彼安樂土。過三界道。若人一生彼國。自然止身口意惡。三者

阿彌陀如來正覺住持力。自然止求聲聞辟支佛心。此三種止。從如來如實功德生。是故言欲如實修行奢摩他故。

云何觀察智慧觀察。正念觀彼。欲如實修行毗婆舍那故。

譯毗婆舍那曰觀。但汎言觀。義亦未滿。何以言之。如觀身無常苦空無我九相等。皆名爲觀。亦如上木名。不得椿柘也。毗婆舍那云觀者。亦有二義。一者在此作想。觀彼三種莊嚴功德。此功德如實故。修行者亦得如實功德。如實功德者。決定得生彼

土。二者一得生彼淨土。卽見阿彌陀佛。未證淨心。菩薩畢竟得證平等法身。與淨心菩薩與上地菩薩畢竟同得寂滅平等。是故言欲如實修行毗婆舍那故。

彼觀察有三種。何等三種。一者觀察彼佛國土莊嚴功德。二者觀察阿彌陀佛莊嚴功德。三者觀察彼諸菩薩莊嚴功德。

心緣其事曰觀。觀心分明曰察。

云何迴向。不捨一切苦惱眾生。心常作願迴向爲首。得成就大悲心故。

迴向有二種相。一者往相。二者還相。往相者。以已功德迴施一切眾生。作願共往生彼阿彌陀如來安樂淨土。還相者。生彼土已。得奢摩他毗婆舍那方便力成就。迴入生死稠林。教化一切眾生。共向佛道。若往若還。皆爲拔眾生渡生死海。是故言迴向爲首。得成就大悲心故。

△觀行體相者。此分中有二體。一者器體。二者眾生體。器分中又有三重。一者國土體相。二者示現自利利他。三者入第一義諦國土體相者。

云何觀察彼佛國土莊嚴功德。彼佛國土莊嚴功德。

者成就不可思議力故。如彼摩尼如意寶性相似相對法故。

不可思議力者。總指彼佛國土十七種莊嚴功德力。不可得思議也。諸經統言有五種不可思議。一者眾生多少不可思議。二者業力不可思議。三者龍力不可思議。四者禪定力不可思議。五者佛法力不可思議。此中佛土不可思議有二種力。一者業力。謂法藏菩薩出世善根大願業力所成。二者正覺阿彌陀法王善住持力所攝。此不可思議如下十七種。一一相皆不可思議。至文當釋。如彼摩

尼如意寶性相似相對者。借彼摩尼如意寶性。示安樂佛土不可思議性也。諸佛入涅槃時。以方便力。畜碎身舍利。以福眾生。眾生福盡。此舍利變爲摩尼如意寶珠。此珠多在大海中。大龍王以爲首飾。若轉輪聖王出世。以慈悲方便。能得此珠。於閻浮提作大饒益。若須衣服飲食燈明樂具。隨意所欲。種種物時。王便潔齋。置珠於長竿頭。發願言。若我實是轉輪王者。願寶珠雨如此之物。若徧一里。若十里。若百里。隨我心願。爾時即便於虛空中。雨種種物。皆稱所須。滿足天下一切人願。以此寶性。

力故。彼安樂佛土亦如是。以安樂性種種成就故。相似相對者。彼寶珠力。求衣食者。能雨衣食等物。稱求者意。非是不求。彼佛土則不然。性滿足成就。故無所乏少。片取彼性爲喻。故言相似相對。又彼寶。但能與眾生衣食等願。不能與眾生無上道願。又彼寶。但能與眾生一身願。不能與眾生無量身願。有如是等無量差別。故言相似。

觀察彼佛國土莊嚴功德成就者。有十七種應知。何等十七。一者莊嚴清淨功德成就。二者莊嚴量功德成就。三者莊嚴性功德成就。四者莊嚴形相功德成

就。五者莊嚴種種事功德成就。六者莊嚴妙色功德成就。七者莊嚴觸功德成就。八者莊嚴三種功德成就。九者莊嚴兩功德成就。十者莊嚴光明功德成就。十一者莊嚴妙聲功德成就。十二者莊嚴主功德成就。十三者莊嚴眷屬功德成就。十四者莊嚴受用功德成就。十五者莊嚴無諸難功德成就。十六者莊嚴大義門功德成就。十七者莊嚴一切所求滿足功德成就。

先舉章門次續提釋。

莊嚴清淨功德成就者。偈言。觀彼世界相勝過三界。

道故。

此云何不思議。有凡夫人煩惱成就。亦得生彼淨土。三界繫業。畢竟不牽。則是不斷煩惱。得涅槃分。焉可思議。

莊嚴量功德成就者。偈言。究竟如虛空。廣大無邊際。故。

此云何不思議。彼國人天。若意欲宮殿樓閣。若廣一由旬。若百由旬。若千由旬。千間萬間。隨心所成。人各如此。又十方世界眾生。願往生者。若已生。若今生。若當生。一時一日之頃。算數所不能知其多。

少。而彼世界常若虛空。無迫迮相。彼中眾生。住如此量中。志願廣大。亦如虛空。無有限量。彼國土量。能成眾生心行量。何可思議。

莊嚴性功德成就者。偈言。正道大慈悲。出世善根生故。

此云何不思議。譬如迦羅求羅蟲。其形微小。若得大風。身如大山。隨風大小。爲己身相。生安樂眾生。亦復如是。生彼正道世界。卽成就出世善根。入正定聚。亦如彼蟲。非身而身焉。可思議。

莊嚴形相功德成就者。偈言。淨光明滿足。如鏡日月。

輪故。

此云何不思議。夫忍辱得端正。我心影響也。一得生彼。無瞋忍之殊。人天色像。平等妙絕。蓋淨光之力也。彼光非心行。而爲心行之事。焉可思議。

莊嚴種種事功德成就者。偈言。備諸珍寶性。具足妙莊嚴故。

此云何不思議。彼種種事。或一寶十寶百千種寶。隨心稱意。無不具足。若欲令無倏焉化沒。心得自在。有踰神通。安可思議。

莊嚴妙色功德成就者。偈言。無垢光燄熾。明淨曜世。

間故。

此云何不思議。其光曜事。則映徹表裏。其光曜心。則終盡無明。光爲佛事。焉可思議。

莊嚴觸功德成就者。偈言。寶性功德草。柔輒左右旋。觸者生勝樂。過迦旃陀故。

此云何不思議。夫寶例堅強。而此柔輒。觸樂應著。而此增道事。同愛作。何可思議。有菩薩字愛作。形容端正。生人染著。經言染之者。或生天上。或發菩提心。

莊嚴三種功德成就者。有三種事。應知何等三種。一

者水。二者地。三者虛空。

此三種所以并言。以同類者故也。何以言之。一者六大類。所謂虛空識。地水火風。二者無分別類。所謂地水火風虛空。但言三類者。識一大。屬眾生世間故。火一大。彼中無故。雖有風。風不可見故。無住處故。是以六大五類中。取有而可莊嚴三種并言之。

莊嚴水功德成就者。偈言寶華千萬種。彌覆池流泉。微風動華葉。交錯光亂轉故。

此云何不思議。彼淨土人天。非水穀身。何須水耶。

清淨成就。不須洗濯。復何用水耶。彼中無四時。常調適。不煩熱。復何須水耶。不須而有。當有所以。經言。彼諸菩薩。及聲聞。若人寶池。意欲令水沒足。水卽沒足。欲令至膝。水卽至膝。欲令至腰。水卽至腰。欲令至頸。水卽至頸。欲令灌身。自然灌身。欲令還復。水輒還復。調和冷煖。自然隨意。開神悅體。蕩除心垢。清明澄潔。淨若無形。寶沙映徹。無深不照。微瀾迴流。轉相灌注。安詳徐逝。不遲不疾。波揚無量。自然妙聲。隨其所應。莫不聞者。或聞佛聲。或聞法聲。或聞僧聲。或聞寂靜聲。空無我聲。大慈悲聲。波

羅蜜聲。或聞十力無畏不共法聲。諸通慧聲。無所作聲。不起滅聲。無生忍聲。乃至甘露灌頂眾妙法聲。如是等聲。稱其所聞。歡喜無量。隨順清淨離欲寂滅真實之義。隨順三寶力無所畏不共之法。隨順通慧菩薩聲聞所行之道。無有三塗苦難之名。但有自然快樂之音。是故其國名曰安樂。此水爲佛事。安可思議。

莊嚴地功德成就者。偈言。宮殿諸樓閣。觀十方無礙。雜樹異光色。寶欄徧圍繞。故。

此云何不思議。彼種種事。或一寶十寶百寶無量。

寶隨心稱意。莊嚴具足。此莊嚴事。如淨明鏡。十方國土淨穢諸相。善惡業緣。一切悉現。彼中人天見斯事故。探湯不及之情。自然成就。亦如諸大菩薩。以照法性等寶爲冠。此寶冠中。皆見諸佛。又了達一切諸法之性。又如佛說法華經時。放眉間光照於東方萬八千土。皆如金色。從阿鼻獄。上至有頂諸世界中。六道眾生。生死所趣。善惡業緣。受報好醜。於此悉見。蓋斯類也。此影爲佛事。安可思議。莊嚴虛空功德成就者。偈言。無量寶交絡。羅網徧虛空。種種鈴發響。宣吐妙法音。故。

此云何不思議。經言。無量寶網。彌覆佛土。皆以金縷眞珠。百千雜寶。奇妙珍異。莊嚴校飾。周匝四面。垂以寶鈴。光色晃耀。盡極嚴麗。自然德風。徐起微動。其風調和。不寒不暑。溫涼柔軟。不遲不疾。吹諸羅網。及眾寶樹。演發無量微妙法音。流布萬種溫雅德香。其有聞者。塵勞垢習。自然不起。風觸其身。皆得快樂。此聲爲佛事。焉可思議。

莊嚴雨功德成就者。偈言。雨華衣莊嚴。無量香普熏故。

此云何不思議。經言。風吹散華。徧滿佛土。隨色次

第而不雜亂。柔軟光澤馨香芬烈。足履其上。陷下四寸。隨舉足已。還復如故。華用已訖。地輒開裂。以次化沒。清淨無遺。隨其時節。風吹散華。如是六返。又眾寶蓮華。周滿世界。一一寶華。百千億葉。其華光明無量。種色青色青光。白色白光。玄黃朱紫光。色赫然。曄曄煥爛。明曜日月。一一華中。出三十六百千億光。一一光中。出三十六百千億佛。身色紫金。相好殊特。一一諸佛。又放百千光明。普爲十方說微妙法。如是諸佛。各各安立無量眾生於佛正道。華爲佛事。安可思議。

莊嚴光明功德成就者。偈言。佛慧明淨日。除世癡闇冥故。

此云何不思議。彼土光明從如來智慧報起。觸之者。無明黑闇終必消除。光明非慧能爲慧用。焉可思議。

莊嚴妙聲功德成就者。偈言。梵聲悟深遠。微妙聞十方故。

此云何不思議。經言。若人但聞彼國土清淨安樂。剋念願生。亦得往生。卽入正定聚。此是國土名字爲佛事。安可思議。

莊嚴主功德成就者。偈言正覺阿彌陀法王善住持故。

此云何不思議。正覺阿彌陀不可思議。彼安樂淨土。爲正覺阿彌陀善力住持。云何可得思議耶。住名不異不滅。持名不散不失。如以不朽藥塗種子。在水不爛。在火不焦。得因緣則生。何以故。不朽藥力故。若人一生安樂淨土。後時意願生三界教化眾生。捨淨土命。隨願得生。雖生三界雜生水火中。無上菩提種子。畢竟不朽。何以故。以經正覺阿彌陀善住持故。

莊嚴眷屬功德成就者。偈言。如來淨華眾。正覺華化生故。

此云何不思議。凡是雜生世界。若胎若卵若溼若化。眷屬若干。苦樂萬品。以雜業故。彼安樂國土。莫非是阿彌陀如來正覺淨華之所化生。同一念佛。無別道故。遠通夫法界之內。皆爲兄弟也。眷屬無量焉。可思議。

莊嚴受用功德成就者。偈言。愛樂佛法味。禪三昧爲食故。

此云何不思議。不食而資命。蓋所資有以也。豈不

是如來滿本願乎。乘佛願爲我命。焉可思議。

莊嚴無諸難功德成就者。偈言永離身心惱。受樂常無間故。

此云何不思議。經言身爲苦器。心爲惱端。而彼有身有心。而受樂無間。安可思議。

莊嚴大義門功德成就者。偈言大乘善根界等無譏嫌名。女人及根缺。二乘種不生故。淨土果報離二種譏嫌過。應知。一者體。二者名。體有三種。一者二乘人。二者女人。三者諸根不具人。無此三過故。名離體譏嫌名亦三種。非但無三體。乃至不聞二乘女人諸根

不具三種名故名離名譏嫌等者平等一相故。

此云何不思議夫諸天共器飯有隨福之色足指

按地乃詳金礫之旨而願往生者本則三三之品

今無一二之殊亦如淄澠食陵反一味焉可思議。

莊嚴一切所求滿足功德成就者偈言眾生所願樂

一切能滿足故。

此云何不思議彼國人天若欲願往他方世界無

量佛刹供養諸佛菩薩及所須供養之具無不稱

願又欲捨彼壽命向餘國生脩短自在隨願皆得

未階自在之位而同自在之用焉可思議。

△示現自利利他者。

略說彼阿彌陀佛國土十七種莊嚴功德成就。示現如來自身利益大功德力成就。利益他功德成就。故言略者。彰彼淨土功德無量。非唯十七種也。夫須彌之入芥子。毛孔之納大海。豈山海之神乎。毛芥之力乎。能神者神之耳。是故十七種雖曰利他。自利之義。炳然可知。

△入第一義諦者。

彼無量壽佛國土莊嚴第一義諦妙境界相十六句。及一句次第說。應知。

第一義諦者佛因緣法也。此諦是境義。是故莊嚴等十六句。稱爲妙境界相。此義至入一法句文。當

更解釋

詳下二十七頁共四十三行

及一句次第者。謂觀器淨

等總別十七句觀行次第也。云何起次。建章言歸命無礙光如來願生安樂國。此中有疑。疑言生爲有本。衆累之元。棄生願生。生何可盡。爲釋此疑。是故觀彼淨土莊嚴功德成就。明彼淨土。是阿彌陀如來清淨本願無生之生。非如三有虛妄生也。何以言之。夫法性清淨畢竟無生。言生者。是得生者之情耳。生苟無生。生何所盡。盡夫生者。上失無爲

能爲之身。下

醉亡善反

三空不空之痼。

廢病也。工路反。

根敗

永亡。號振三千。無反無復。於斯招恥。體夫生理。謂之淨土。淨土之宅。所謂十七句是也。十七句中。總別爲二。初句是總相。所謂是清淨佛土。過三界道。彼過三界有何相。下十六種莊嚴功德成就相是也。一者量。究竟如虛空。廣大無邊際故。既知量。此量以何爲本。是故觀性。性是本義。彼淨土從正道。大慈悲出世善根生。既言出世善根。此善根生何等相。是故次觀莊嚴形相。既知形相。宜知形相何等體。是故次觀種種事。既知種種事。宜知種種事。

妙色。是故次觀妙色。既知妙色。此色有何觸。是故次觀觸。既知身觸。應知眼觸。是故次觀水地虛空。莊嚴三事。既知眼觸。應知鼻觸。是故次觀衣華香熏。既知眼鼻等觸。須知離染。是故次觀佛慧明照。既知慧光淨力。宜知聲名遠近。是故次觀梵聲遠聞。既知聲名。宜知誰爲增上。是故次觀主。既知有主。誰爲主。眷屬。是故次觀眷屬。既知眷屬。宜知此眷屬若爲受用。是故次觀受用。既知受用。宜知此受用有難無難。是故次觀無諸難。既知無諸難以何義。故無諸難。是故次觀大義門。既知大義門。宜

知大義門滿不滿。是故次觀所求滿足。復次此十七句。非但釋疑。觀此十七種莊嚴成就。能生真實淨信。必定得生彼安樂佛土。問曰。上言知生無生。當是上品生者。若下下品人。乘十念往生。豈非取實生耶。但取實生。卽墮二執。一恐不得往生。二恐更生迷惑。答。譬如淨摩尼珠。置之濁水。水卽清淨。若人雖有無量生死之罪濁。聞彼阿彌陀如來至極無生清淨寶珠名號。投之濁心。念念之中。罪滅心淨。卽得往生。又是摩尼珠。以玄黃幣裹。投之於水。水卽玄黃。一如物色。彼清淨佛土。有阿彌陀如

來無上寶珠。以無量莊嚴功德成就帛裏。投之於
所往生者心水。豈不能轉生見爲無生智乎。又如
冰上燃火。火猛則冰解。冰解則火滅。彼下品人。雖
不知法性無生。但以稱佛名力。作往生意。願生彼
土。彼土是無生界。見生之火。自然而滅。

△眾生體者。此分中有二重。一者觀佛。二者觀菩薩
觀佛者

云何觀佛莊嚴功德成就。觀佛莊嚴功德成就者。有
八種相應知。

此觀義已彰前偈。

何等八種。一者莊嚴座功德成就。二者莊嚴身業功德成就。三者莊嚴口業功德成就。四者莊嚴心業功德成就。五者莊嚴大眾功德成就。六者莊嚴上首功德成就。七者莊嚴主功德成就。八者莊嚴不虛作住持功德成就。

何者莊嚴座功德成就。偈言。無量大寶王。微妙淨華臺故。

若欲觀座。當依觀無量壽經。

何者莊嚴身業功德成就。偈言。相好光一尋。色像超羣生故。

若欲觀佛身。當依觀無量壽經。

何者莊嚴口業功德成就。偈言。如來微妙聲。梵響聞十方故。

何者莊嚴心業功德成就。偈言。同地水火風。虛空無分別故。無分別者。無分別心故。

凡夫眾生身口意三業。以造罪輪轉三界。無有窮已。是故諸佛菩薩莊嚴身口意三業。用治眾生虛誑三業也。云何用治。眾生以身見故。受三塗身。卑賤身。醜陋身。八難身。流轉身。如是等眾生。見阿彌陀如來相好光明身者。如上種種身業繫縛。皆得

解脫。入如來家。畢竟得平等身業。眾生以憍慢故。

誹謗正法。毀訾賢聖。捐庫尊長。尊者君父師也。長者有德之人。及兄

黨也。如是人應受拔舌苦。瘡痍苦。言教不行苦。無名

聞苦。如是等種種諸苦。眾生聞阿彌陀如來至德

名號。說法音聲。如上種種口業。繫縛。皆得解脫。入

如來家。畢竟得平等口業。眾生以邪見故。心生分

別。若有若無。若非若是。若好若醜。若善若惡。若彼

若此。有如是等種種分別。以分別故。長淪三有。受

種種分別苦。取捨苦。長寢大夜。無有出期。是眾生

若遇阿彌陀如來平等光照。若聞阿彌陀如來平

等意業。是等眾生。如上種種意業繫縛。皆得解脫。入如來家。畢竟得平等意業。問曰。心是覺知相。云何可得同地水火風無分別耶。答曰。心雖知相。入實相則無知也。譬如蛇性雖曲。入竹筒則直。又如人身若鍼刺。若蜂螫。式亦反則有覺知。若石蛭。之一反一噉。若甘刀割。則無覺知。如是等有知無知。在於因緣。若在因緣。則非知非無知也。問曰。心入實相。可令無知。云何得有一切種智耶。答曰。凡心有知。則有所不知。聖心無知。故無所不知。無知而知。知即無知也。問曰。既言無知。故無所不知。若無所不知。

者豈不是知種種法耶。既知種種之法。復云何言無所分別耶。答曰。諸法種種相。皆如幻化。然幻化象馬。非無長頸鼻首足異。而智者觀之。豈言定有象馬分別之耶。

何者。莊嚴大眾功德成就。偈言。天人不動眾。清淨智海生故。

何者。莊嚴上首功德成就。偈言。如須彌山王。勝妙無過者故。

何者。莊嚴主功德成就。偈言。天人丈夫眾。恭敬繞瞻仰故。

何者莊嚴不虛作住持功德成就。偈言觀佛本願力。遇無空過者。能令速滿足。功德大寶海故。

不虛作住持功德成就者。蓋是阿彌陀如來本願力也。今當略示虛作之相。不能住持。用顯彼不虛

作住持之義。人有輟

止也。貞劣反。

餐養士。或釁起舟中。

積金盈庫。而不免餓死。如斯之事。觸目皆是。得非作得。在非守在。皆由虛妄業作。不能住持也。所言不虛作住持者。依本法藏菩薩四十八願。今日阿彌陀如來自在神力。願以成力。力以就願。願不徒然。力不虛設。力願相符。畢竟不差。故曰成就。

卽見彼佛。未證淨心菩薩。畢竟得證平等法身。與淨心菩薩。與上地諸菩薩。畢竟同得寂滅平等故。

平等法身者。八地已上法性生身菩薩也。寂滅平等者。卽此法身菩薩所證寂滅平等之法也。以得此寂滅平等法故。名爲平等法身。以平等法身菩薩所得故。名爲寂滅平等法也。此菩薩得報生三昧。以三昧神力。能一處一念一時。徧十方世界。種種供養一切諸佛。及諸佛大會眾海。能於無量世界。無佛法僧處。種種示現。種種教化。度脫一切眾生。常作佛事。初無往來想。供養想。度脫想。是故此

身名爲平等法身。此法名爲寂滅平等法也。未證淨心菩薩者。初地已上七地已還諸菩薩也。此菩薩亦能現身。若百若千若萬若億若百千萬億。無佛國土施作佛事。要須作心入三昧乃能。非不作心。以作心故。名爲未得淨心。此菩薩願生安樂淨土。卽見阿彌陀佛。見阿彌陀佛時。與上地諸菩薩畢竟身等法。等。龍樹菩薩婆藪槃頭菩薩輩。願生彼者。當爲此耳。問曰。案十地經。菩薩進趣階級。漸有無量功勳。經多劫數。然後乃得。此云何見阿彌陀佛時。畢竟與上地諸菩薩身等法。等耶。答曰。言

畢竟者。未言卽等也。畢竟不失此等。故言等耳。問曰。若不卽等。復何待言。菩薩但登初地。以漸增進。自然當與佛等。何假言與上地菩薩等。答曰。菩薩於七地中。得大寂滅。上不見諸佛可求。下不見眾生可度。欲捨佛道。證於實際。爾時若不得十方諸佛神力加勸。卽便滅度。與二乘無異。菩薩若往生安樂。見阿彌陀佛。卽無此難。是故須言畢竟平等。復次無量壽經中。阿彌陀如來本願言。設我得佛。他方佛土諸菩薩眾。來生我國。究竟必至一生補處。除其本願自在所化。爲眾生故。被弘誓鎧。積累

德本。度脫一切遊諸佛國。修菩薩行。供養十方諸佛如來。開化恆沙無量眾生。使立無上正眞之道。超出常倫諸地之行。現前修習普賢之德。若不爾者。不取正覺。案此經推。彼國菩薩。或可不從一地至一地。言十地階次者。是釋迦如來於閻浮提。一應化道耳。他方淨土。何必如此。五種不思議中。佛法最不可思議。若言菩薩必從一地至一地。無超越之理。未敢詳也。譬如有樹。名曰好堅。是樹地生。百歲乃具。一日長高百丈。日日如此。計百歲之長。豈類脩松耶。見松生長。日不過寸。聞彼好堅。何能

不疑。卽同有人聞釋迦如來證羅漢於一聽。制無
生於終朝。謂是接誘之言。非稱實之說。聞此論事。
亦當不信。夫非常之言。不入常人之耳。謂之不然。
亦其宜也。

略說八句。示現如來自利利他功德莊嚴次第成就。
應知。

此云何次第。前十七句是莊嚴國土功德成就。旣
知國土相應。知國土之主。是故次觀佛莊嚴功德。
彼佛若爲莊嚴於何處坐。是故先觀座。旣知座已。
宜知座主。是故次觀佛莊嚴身業。旣知身業。應知

有何聲名。是故次觀佛莊嚴口業。既知名聞。宜知得名所以。是故次觀莊嚴心業。既知三業具足。應爲人天大師。堪受化者。是誰。是故次觀大眾功德。既知大眾有無量功德。宜知上首者誰。是故次觀上首。上首是佛。既知上首。恐同長幼。是故次觀主。既知是主。主有何增上。是故次觀莊嚴不虛作住持。八句次第成已。

△觀菩薩者

云何觀察菩薩莊嚴功德成就。觀察菩薩莊嚴功德成就者。觀彼菩薩有四種正修行功德成就。應知。

真如是諸法正體體如而行則是不行不行而行
名如實修行體唯一如而義分爲四。是故四行以
一正統之。

何者爲四一者於一佛土身不動搖而徧十方種種
應化如實修行常作佛事偈言安樂國清淨常轉無
垢輪化佛菩薩日如須彌住持故開諸眾生淤泥華
故。

八地已上菩薩常在三昧以三昧力身不動本處
而能徧至十方供養諸佛教化眾生無垢輪者佛
地功德也。佛地功德無習氣煩惱垢佛爲諸菩薩

常轉此法輪。諸大菩薩亦能以此法輪開導一切。無暫時休息。故言常轉。法身如日而應化身光徧諸世界也。言日未足以明不動。復言如須彌住持也。淤泥華者。經言高原陸地不生蓮華。卑溼淤泥乃生蓮華。此喻凡夫在煩惱泥中。爲菩薩開導。能生佛正覺華。諒夫紹隆三寶。常使不絕。

二者彼應化身。一切時不前不後。一心一念。放大光明。悉能徧至十方世界。教化眾生種種方便。修行所作。滅除一切眾生苦。故偈言無垢莊嚴光。一念及時。普照諸佛會。利益諸羣生。故。

上言不動而至。容或至有前後。是故復言一念一時無前後也。

三者彼於一切世界無餘。照諸佛會大眾無餘。廣大無量。供養恭敬讚歎諸佛如來功德。偈言。雨天樂華衣。妙香等供養讚諸佛功德。無有分別心故。

無餘者。明徧至一切世界。一切諸佛大會。無有一世界一佛會不至也。肇公言。法身無像而殊形。並應至韻無言。而玄籍彌布。冥權無謀而動與事會。蓋斯意也。

四者彼於十方一切世界無三寶處。住持莊嚴佛法。

僧寶功德大海。徧示令解。如實修行。偈言何等世界。無佛法功德寶。我願皆往生。示佛法如佛故。

上三句。雖言徧至。皆是有佛國土。若無此句。便是法身有所不法。上善有所不善。觀行體相竟。

△已下是解義中第四重名爲淨入願心。淨入願心者。

又向說觀察莊嚴佛土功德成就。莊嚴佛功德成就。莊嚴菩薩功德成就。此三種成就。願心莊嚴。應知。

應知者。應知此三種莊嚴成就。由本四十八願等。清淨願心之所莊嚴。因淨故果淨。非無因他。因有。

也。

略說入一法句故。

上國土莊嚴十七句。如來莊嚴八句。菩薩莊嚴四句。爲廣。入一法句。爲略。何故示現廣略相入。諸佛菩薩有二種法身。一者法性法身。二者方便法身。由法性法身。生方便法身。由方便法身。出法性法身。此二法身。異而不可分。一而不可同。是故廣略相入。統以法名。菩薩若不知廣略相入。則不能自利利他。

一法句者。謂清淨句。清淨句者。謂眞實智慧無爲法。

身故。

此三句展轉相入。依何義名之爲法。以清淨故。依何義名爲清淨。以眞實智慧無爲法身故。眞實智慧者。實相智慧也。實相無相。故眞智無知也。無爲法身者。法性身也。法性寂滅。故法身無相也。無相故能無不相。是故相好莊嚴。卽法身也。無知故能無不知。是故一切種智。卽眞實智慧也。以眞實而目智慧。明智慧非作非非作也。以無爲而標法身。明法身非色非非色也。非於非者。豈非非之能是非乎。蓋無非之曰是也。自是無待夫非是也。非是非

非。百非之所不喻。是故言清淨句。清淨句者。謂眞實智慧無爲法身也。

此清淨有二種。應知。

上轉入句中。通一法入清淨。通清淨入法身。今將別清淨出二種故。故言應知。

何等二種。一者器世間清淨。二者眾生世間清淨。器世間清淨者。如向說十七種莊嚴佛土功德成就。是名器世間清淨。眾生世間清淨者。如向說八種莊嚴佛功德成就。四種莊嚴菩薩功德成就。是名眾生世間清淨。如是一法句。攝二種清淨義。應知。

夫眾生爲別報之體。國土爲共報之用。體用不一。所以應知。然諸法心成。無餘境界。眾生及器。復不得異。不得一。不一則義分。不異同清淨。器者用也。謂彼淨土。是彼清淨眾生之所受用。故名爲器。如淨食用不淨器。以器不淨。故食亦不淨。不淨食用淨器。食不淨。故器亦不淨。要二俱潔。乃得稱淨。是以一清淨名。必攝二種。問曰。言眾生清淨。則是佛與菩薩。彼諸人天。得入此清淨數否。答曰。得名清淨。非實清淨。譬如出家聖人。以殺煩惱賊。故名爲比丘。凡夫出家者。持戒破戒。皆名比丘。又如灌頂。

王子初生之時。具三十二相。七寶卽爲所屬。雖未能爲轉輪王事。亦名轉輪王。以其必爲轉輪王故。彼諸人天亦復如是。皆入大乘正定之聚。畢竟當得清淨法身。以當得故。得名清淨。

△善巧攝化者。

如是菩薩奢摩他毗婆舍那廣略修行。成就柔輭心。柔輭心者。謂廣略止觀。相順修行。成不二心也。譬如以水取影。清淨相資而成就也。

如實知廣略諸法。

如實知者。如實相而知也。廣中二十九句略中一

句。莫非實相也。

如是成就巧方便迴向。

如是者如前後廣略皆實相也。以知實相故。則知三界眾生虛妄相也。知眾生虛妄。則生真實慈悲也。知真實法身。則起真實歸依也。慈悲之與歸依。巧方便在下。

何者菩薩巧方便迴向。菩薩巧方便迴向者。謂說禮拜等五種修行所集一切功德善根。不求自身住持之樂。欲拔一切眾生苦故。作願攝取一切眾生。共同生彼安樂佛國。是名菩薩巧方便迴向成就。

案王舍城所說無量壽經。三輩生中。雖行有優劣。莫不皆發無上菩提之心。此無上菩提心。卽是願作佛心。願作佛心。卽是度眾生心。度眾生心。卽是攝取眾生。生淨佛國土心。是故願生彼安樂淨土者。要發無上菩提心也。若人不發無上菩提心。但聞彼國土受樂無間爲樂。故願生。亦當不得往生也。是故言不求自身住持之樂。欲拔一切眾生苦故。住持樂者。謂彼安樂淨土。爲阿彌陀如來本願力之所住持。受樂無間也。凡釋迴向名義。謂以己所集一切功德。施與一切眾生。共向佛道。巧方便者。

謂菩薩願以己智慧火燒一切眾生煩惱草木。若有一眾生不成佛。我不作佛。而眾生未盡成佛。菩薩已自成佛。譬如火捺德念反。欲摘聽歷反一切草木。燒令使盡。草木未盡。火捺已盡。以後其身而身先。故名巧方便。此中言方便者。謂作願攝取一切眾生。共同生彼安樂佛國。彼佛國卽是畢竟成佛道路。無上方便也。

△離菩提障者。

菩薩如是善知迴向成就。卽能遠離三種菩提門相。違法何等三種。一者依智慧門。不求自樂。遠離我心。

貪著自身故。

知進守退曰智。知空無我曰慧。依智故不求自樂。依慧故遠離我心貪著自身。

二者依慈悲門。拔一切眾生苦。遠離無安眾生心故。拔苦曰慈。與樂曰悲。依慈故拔一切眾生苦。依悲故遠離無安眾生心。

三者依方便門。憐愍一切眾生心。遠離供養恭敬自身心故。

正直曰方。外己曰便。依正直故。生憐愍一切眾生心。依外己故。遠離供養恭敬自身心。

是名遠離三種菩提門相違法。

△順菩提門者。

菩薩遠離如是三種菩提門相違法得三種隨順菩提門法滿足故。何等三種。一者無染清淨心。以不爲自身求諸樂故。

菩提是無染清淨處。若爲身求樂。卽違菩提。是故無染清淨心。是順菩提門。

二者安清淨心。以拔一切眾生苦故。

菩提是安隱一切眾生清淨處。若不作心拔一切眾生離生死苦。卽便違菩提。是故拔一切眾生苦。

是順菩提門。

三者樂清淨心。以令一切眾生得大菩提故。以攝取眾生。生彼國土故。

菩提是畢竟常樂處。若不令一切眾生得畢竟常樂。則違菩提。此畢竟常樂。依何而得。依大乘門。大乘門者。謂彼安樂佛國土是也。是故又言以攝取眾生。生彼國土故。

是名三種隨順菩提門法。滿足應知。

△名義攝對者。

向說智慧慈悲方便三種門。攝取般若般若攝取方

便應知。

般若者。達如之慧名。方便者。通權之智。稱達如則心行寂滅。通權則備省眾機。省機之智。備應而無知。寂滅之慧。亦無知而備省。然則智慧方便相緣而動相緣。而靜動不失。靜智慧之功也。靜不廢動。方便之力也。是故智慧慈悲方便。攝取般若般若。攝取方便。應知者。謂應知智慧方便。是菩薩父母。若不依智慧方便。菩薩法則不成就。何以故。若無智慧。爲眾生時。則墮顛倒。若無方便。觀法性時。則證實際。是故應知。

向說遠離我心不貪著自身遠離無安眾生心遠離
供養恭敬自身心此三種法遠離障菩提心應知。

諸法各有障礙相。如風能障靜。土能障水。溼能障
火。五黑十惡障人天。四顛倒障聲聞果。此中三種
不遠離障菩提心。應知者。若欲得無障當遠離此
三種障礙也。

向說無染清淨心安清淨心樂清淨心。此三種心略
一處成就妙樂勝真心應知。

樂有三種。一者外樂。謂五識所生樂。二者內樂。謂
初禪二禪三禪意識所生樂。三者法樂。九角樂魯

反謂智慧所生樂。此智慧所生樂。從愛佛功德起。是遠離我心。遠離無安眾生心。遠離自供養心。是三種心清淨。增進略爲妙樂。勝真心。妙言其好。以此樂緣佛生故。勝言勝出三界中樂。眞言不虛。僞不顛倒。

△願事成就者。

如是菩薩智慧心。方便心。無障心。勝真心。能生清淨佛國土。應知。

應知者。謂應知此四種清淨功德。能得生彼清淨佛國土。非是他緣而生也。

是名菩薩摩訶薩隨順五種法門所作隨意自在成就。如向所說身業口業意業智業方便智業隨順法門故。

隨意自在者言此五種功德力能生清淨佛土出沒自在也。身業者禮拜也。口業者讚歎也。意業者作願也。智業者觀察也。方便智業者迴向也。言此五種業和合則是隨順往生淨土法門自在業成就。

△利行滿足者。

復有五種門漸次成就五種功德應知何者五門一

者近門。二者大會眾門。三者宅門。四者屋門。五者園林遊戲地門。

此五種示現入出次第相。入相中。初至淨土是近相。謂入大乘正定聚。近阿耨多羅三藐三菩提。入淨土已。便入如來大會眾數。入眾數已。當至修行安心之宅。入宅已。當至修行所居屋宇。尤舉修行成就已。當至教化地。教化地卽是菩薩自娛樂地。是故出門稱園林遊戲地門。

此五種門。初四種門。成就入功德。第五門。成就出功德。

此入出功德門。何者是釋言。

入第一門者。以禮拜阿彌陀佛。爲生彼國故。得生安樂世界。是名入第一門。

禮佛願生佛國。是初功德相。

入第二門者。以讚歎阿彌陀佛。隨順名義。稱如來名。依如來光明智相修行故。得入大會眾數。是名入第二門。

依如來名義讚歎。是第二功德相。

入第三門者。以一心專念。作願生彼。修奢摩他寂靜三昧行故。得入蓮華藏世界。是名入第三門。

爲修寂靜止故。一心願生彼國是第三功德相。

入第四門者。以專念觀察彼妙莊嚴修毗婆舍那故。得到彼處受用種種法味樂。是名入第四門。

種種法味樂者。毗婆舍那中有觀佛國土清淨味。攝受眾生大乘味。畢竟住持不虛作味。類事起行。願取佛土味。有如是等無量莊嚴佛道味。故言種種是第四功德相。

出第五門者。以大慈悲觀察一切苦惱眾生。示應化身。迴入生死園煩惱林中。遊戲神通。至教化地。以本願力迴向故。是名出第五門。

示應化身者。如法華經普門示現之類也。遊戲有二義。一者自在義。菩薩度眾生譬如師子搏鹿。所爲不難。如似遊戲。二者度無所度義。菩薩觀眾生畢竟無所有。雖度無量眾生而實無一眾生得滅度者。示度眾生如似遊戲。言本願力者。示大菩薩於法身中。常在三昧而現種種身。種種神通種種說法。皆以本願力起。譬如阿脩羅琴。雖無鼓者。而音曲自然。是名教化地第五功德相。

菩薩入四種門。自利行成就應知。

成就者。謂自利滿足也。應知者。謂應知由自利故。

則能利他。非是不能自利而能利他也。

菩薩出第五門。迴向利益他。行成就。應知。

成就者。謂以迴向。因證教化地果。若因若果。無有一事不能利他。應知者。謂應知由利他故。則能自利。非是不能利他而能自利也。

菩薩如是修五念門。行自利利他。速得成就。阿耨多羅三藐三菩提故。

佛所得法。名爲阿耨多羅三藐三菩提。以得此菩提。故名爲佛。今言速得阿耨多羅三藐三菩提。是得早作佛也。阿名無耨多羅名上。三藐名正。三名

徧。菩提名道。統而譯之名爲無上正徧道。無上者言此道窮理盡性更無過者。何以言之。以正故。正者聖智也。如法相而知。故稱爲正智。法性無相。故聖智無知也。徧有二種。一者聖心徧知一切法。二者法身徧滿法界。若身若心無不徧也。道者無礙道也。經言十方無礙人。一道出生死。一道者。一無礙道也。無礙者。謂知生死卽是涅槃。如是等入不二法門。無礙相也。問曰。有何因緣。言速得成就阿耨多羅三藐三菩提。答曰。論言修五門行。以自利利他成就故。然覈求其本。阿彌陀如來爲增上緣。

他利之與利他談有左右。若自佛而言宜言利他。自眾生而言宜言他利。今將談佛力是故以利他言之。當知此意也。凡是生彼淨土及彼菩薩人天所起諸行皆緣阿彌陀如來本願力故。何以言之。若非佛力四十八願便是徒設。今的取三願用證義意。願言設我得佛十方眾生至心信樂欲生我國。乃至十念若不得生者不取正覺。唯除五逆誹謗正法。緣佛願力故。十念念佛便得往生。得往生故。卽免三界輪轉之事。無輪轉故。所以得速。一證也。願言設我得佛。國中人人天不住正定。聚必至滅。

度者不取正覺緣佛願力故。住正定聚。住正定聚。故必至滅度。無諸迴伏之難。所以得速。二證也。願言設我得佛。他方佛土諸菩薩眾。來生我國。究竟必至一生補處。除其本願自在。所化爲眾生。故被弘誓鑑。積累德本。度脫一切遊諸佛國。修菩薩行。供養十方諸佛如來。開化恆沙無量眾生。使立無上正眞之道。超出常倫諸地之行。現前修習普賢之德。若不爾者。不取正覺緣佛願力故。超出常倫諸地之行。現前修習普賢之德。以超出常倫諸地行故。所以得速。三證也。以斯而推。他力爲增上緣。

得不然而乎。當復引例示自力他力相。如人畏三塗。故受持禁戒。受持禁戒。故能修禪定。以禪定。故修習神通。以神通。故能遊四天下。如是等名爲自力。又如劣夫跨驢不上。從轉輪王行。便乘虛空。遊四天下。無所障礙。如是等名爲他力。愚哉後之學者。聞他力可乘。當生信心。勿自局分也。

無量壽脩多羅優婆提舍願生偈略解義竟

經始稱如是。彰信爲能入。末言奉行。表服膺事已。論初歸禮。明宗旨有由。終云義竟。示所詮理畢。述作人殊於茲。成例。

無量壽經優婆提舍願生偈註卷下

案淨土宗以三經一論爲宗要。所謂論者卽天親菩薩所造往生論是也。元魏曇鸞法師爲之註。中土久佚。近年得自日本。已由金陵刻經處刻行於世。唯古人稱註者皆直註本文之下。絕域傳鈔。遂將註文與論文混而爲一。今以註文低一格書之。較爲醒目。復荷普陀印光法師合鸞師略論淨土義及讚佛偈。一再校訂。由本處重付剞劂。以餉當世。或亦足爲讀斯論之一助歟。北京刻經處附識

在古言名一

三

略論安樂淨土義

魏西河石壁谷玄中寺沙門曇鸞撰

問曰。安樂國於三界中何界所攝。答曰。如釋論言。如斯淨土。非三界所攝。何以故。無欲故。非欲界。地居故。非色界。有形色故。非無色界。經曰。阿彌陀佛本行菩薩道時。作比丘名曰法藏。於世自在王佛所。請問諸佛淨土之行。時佛爲說二百一十億諸佛刹土天人善惡國土精麤。悉現與之。於時法藏菩薩卽於佛前發弘誓大願。取諸佛土。於無量阿僧祇劫。如所發願。行諸波羅蜜。萬善圓滿。成無上道。別業所得。非三界

也。

問曰。安樂國有幾種莊嚴。名爲淨土。答曰。若依經據義。法藏菩薩四十八願。卽是其事。尋讀可知。不復重序。若依無量壽論。以二種清淨。攝二十九種莊嚴成就。二種清淨者。一器世間。二是眾生世間。清淨器世間。清淨有十七種莊嚴成就。一者國土相勝過三界道。二者其國廣大。量如虛空。無有齊限。三者從菩薩正道。大慈悲出世善根所起。四者清淨光明圓滿莊嚴。五者備具第一珍寶性。出奇妙寶物。六者潔淨光明常照世間。七者其國寶物柔輭觸者適悅。生於勝

樂。八者千萬寶華。莊嚴池沼。寶殿寶樓閣。種種寶樹。雜色光明。影納世界。無量寶網。覆虛空。四面懸鈴。常吐法音。九者於虛空中自然常雨天華。天衣。天香。莊嚴普熏。十者佛慧光明。照除癡闇。十一者梵聲開悟。遠聞十方。十二者阿彌陀佛無上法王善力住持。十三者從如來淨華所化生。十四者愛樂佛法味禪三昧爲食。十五者永離身心諸苦。受樂無間。十六者乃至不聞二乘女人根缺之名。十七者眾生有所欲樂。隨心稱意。無不滿足。如是等十七種。是名器世間清淨。眾生世間清淨。有十二種莊嚴成就。一者無量大。

珍寶王微妙華臺以爲佛座。二者無量相好無量光
明莊嚴佛身。三者佛無量辯才。應機說法。具足清白。
令人樂聞。聞者必悟解。言不虛說。四者佛真如智慧。
猶如虛空。照了諸法。總相別相。心無分別。五者天人
不動眾。廣大莊嚴。譬如須彌山。映顯四大海。法王相
具足。六者成就無上果。尙無能及。况復過者。七者爲
天人丈夫調御師。大眾恭敬圍遶。如師子王。師子圍
遶。八者佛本願力莊嚴。住持諸功德。遇者無空過。能
令速滿足。一切功德海。未證淨心菩薩。畢竟得證平
等法身。與淨心菩薩。與上地菩薩。畢竟同得寂滅平

等九者安樂國諸菩薩眾身不動搖而徧至十方種種應化如實修行常作佛事十者如是菩薩應化身一切時不前不後一心一念放大光明悉能徧至十方世界教化眾生種種方便修行所作滅除一切眾生苦惱十一者是等菩薩於一切世界無餘照諸佛大會無餘廣大無量供養恭敬讚歎諸佛如來功德十二者是諸菩薩於十方一切世界無三寶處住持莊嚴佛法僧寶功德大海徧示令解如實修行如是等法王八種莊嚴功德成就如是菩薩四種莊嚴功德成就名眾生世間清淨安樂國土具如是等二

十九種莊嚴功德成就故名淨土。

問曰。生安樂土者。凡有幾輩。有幾因緣。答曰。無量壽經中。唯有三輩。上。中。下。無量壽觀經中。一品分爲上中下。三三而九。合爲九品。今依傍無量壽經爲讚。且據此經作三品論之。上輩生者有五因緣。一者捨家離欲而作沙門。二者發無上菩提心。三者一向專念無量壽佛。四者修諸功德。五者願生安樂國。具此因緣。臨命終時。無量壽佛與諸大眾現其人前。即便隨佛往生安樂。於七寶華中。自然化生。住不退轉。智慧勇猛。神通自在。中輩生者。有七因緣。一者發無上菩

提心。二者一向專念無量壽佛。三者多少修善奉持齋戒。四者起立塔像。五者飯食沙門。六者懸繒燃燈散華燒香。七者以此迴向願生安樂。臨命終時無量壽佛化現其身。光明相好。具如真佛。與諸大眾現其人前。卽隨化佛往生安樂。住不退轉。功德智慧。次如上輩。下輩生者。有三因緣。一者假使不能作諸功德。當發無上菩提心。二者一向專意。乃至十念念無量壽佛。三者以至誠心願生安樂。臨命終時。夢見無量壽佛。亦得往生。功德智慧。次如中輩。

又有一種往生安樂。不入三輩中。謂以疑惑心修諸

功德願生安樂。不了佛智。不思議智。不可稱智。大乘廣智。無等無倫。最上勝智。於此諸智。疑惑不信。然猶信罪福。修習善本。生安樂國。七寶宮殿。或百由旬。或五百由旬。各於其中。受諸快樂。如忉利天。亦皆自然。於五百歲中。常不見佛。不聞經法。不見菩薩聲聞聖眾。安樂國土。謂之邊地。亦曰胎生邊地者。言其五百歲中。不見聞三寶。義同邊地之難。或亦於安樂國土。最在其邊。胎生者。譬如胎生人。初生之時。人法未成。邊言其難。胎言其闇。此二名皆借此況彼耳。非是八難中邊地。亦非胞胎中胎生。何以知之。安樂國土一

向化生故。故知非實胎生。五百年後。還得見聞三寶。故。故知非八難中邊地也。

問曰。彼胎生者。處七寶宮殿中。受快樂否。復何所憶。念。答曰。經喻云。譬如轉輪王子。得罪於王。內於後宮。繫以金鎖。一切供具無所乏少。猶如王。王子於時。雖有好妙種種自娛樂具。心不受樂。但念設諸方便。求免怖出。彼胎生者。亦復如是。雖處七寶宮殿。有好色香味觸。不以爲樂。但不見三寶。不得供養修諸善本。以之爲苦。識其本罪。深自責悔。求離彼處。卽得如意。還同三輩生者。當是五百年末。方識罪悔耳。

問曰。以疑惑心。往生安樂。名曰胎生者。云何起疑。答曰。經中但云疑惑不信。不出所以疑意。尋不了五句。敢以對治言之。不了佛智者。謂不能信了佛一切種智。不了故。故起疑。此一句總辨所疑。下四句一一對治所疑。疑有四意。

一者疑但憶念阿彌陀佛。不必得往生安樂。何以故。經曰。業道如秤。重者先牽。云何一生或百年或十年。或一月。無惡不造。但以十念相續。便得往生。卽入正定。聚畢竟不退。與三途諸苦永隔乎。若爾。先牽之義。何以可信。又曠劫已來。俱造諸行有漏之法。繫屬三

界云何不斷三界結惑。直以少時念阿彌陀佛。便出三界乎。繫業之義。復欲云何對治此疑。故言不思議。智。不思議智者。謂佛智力。能以少作多。以多作少。以近爲遠。以遠爲近。以輕爲重。以重爲輕。以長爲短。以短爲長。如是等佛智無量無邊。不可思議。譬如百夫百年聚薪。積高千仞。豆許火焚。半日便盡。豈可得言百年之薪。積半日不盡乎。又如躡者寄載他船。因風帆勢。一日至千里。豈可得言躡者云何一日至千里乎。又如下賤貧人。獲一瑞物。而以貢主。主慶所得。加諸重賞。斯須之頃。富貴盈溢。豈可得言以頗有數十

年仕備盡辛勩。上下尙不達歸者。言彼富貴無此事乎。又如劣夫以己身力。擲驢不上。從轉輪王行。便乘虛空飛騰自然。復可以擲驢之劣夫。言必不能乘空耶。又如十圍之索。千夫不制。童子揮劍。瞬頃兩分。豈可得言一小兒力不能斷索乎。又如鳩鳥入水。魚蚌斯斃。犀角觸泥。死者咸起。豈可得言性命一斷無可生乎。又如黃鵠呼子安。子安還活。豈可得言墳下千歲靈。決無可甦乎。一切萬法。皆有自力他力。自攝他攝。千開萬閉。無量無邊。安得以有礙之識。疑彼無礙之法乎。又五不思議中。佛法最不可思議。而以百年

之惡爲重。疑十念念佛爲輕。不得往生安樂入正定聚者。是事不然。

二者疑佛智於人不爲懸絕。何以故。夫一切名字從相待生。覺智從不覺生。如人迷方。從記方生。若使迷絕不迷。迷卒不解。迷若可解。必迷者解。亦可云解者迷。迷解。解迷猶手反覆耳。乃可明昧爲異。亦安得超然哉。起此疑故。於佛智慧生疑不信。對治此疑。故言不可稱智。不可稱智者。言佛智絕稱。謂非相形待。何以言之。法若是有。必應有知有之智。法若是無。亦應有知無之智。諸法離於有無。故佛冥諸法。則智絕相

待汝引解迷爲喻猶是一迷耳。不成迷解亦如夢中與他解夢雖云解夢非是不夢。以知取佛不曰知佛。以不知取佛非知佛。以非知非不知取佛亦非知佛。以非非知非非不知取佛亦非知佛。佛智離此四句緣之者心行滅。指之者言語斷。以是義故釋論云若人見般若。是則爲被縛。若不見般若。是亦爲被縛。若人見般若。是則爲解脫。若不見般若。是亦爲解脫。此偈中說不離四句者爲縛。離四句者爲解脫。汝疑佛智與人不懸絕者。是事不然。

三者疑佛不能實度一切眾生。何以故。過去世有無

量阿僧祇恆沙諸佛。現在十方世界亦有無量無邊阿僧祇恆沙諸佛。若使佛實能度一切眾生。則應久無三界。第二佛則不應復爲眾生發菩提心。具修淨土。攝受眾生。而實有第二佛攝受眾生。乃至實有三世十方無量諸佛攝受眾生。故知佛實不能度一切眾生。起此疑故。於阿彌陀佛作有量想。對治此疑。故言大乘廣智。大乘廣智者。言無法不知。無煩惱不斷。無善不備。無眾生不度。所以有三世十方者。有五義。一者若使無第二佛。乃至無阿僧祇恆沙諸佛者。佛便不能度一切眾生。以實能度一切眾生故。則有十

方無量諸佛。無量諸佛。卽是前佛所度眾生。二者若一佛度一切眾生盡者。後亦不應復有佛。何以故。無覺他義故。復依何義說有三世佛乎。依覺他義故。說佛佛皆度一切眾生。三者後佛能度。猶是前佛之能。何以故。由前佛有後佛故。譬如帝王之中。得相紹襲。後主卽是前王之能故。四者佛力雖能度一切眾生。要須有因緣。若眾生與前佛無因緣。復須後佛。如是無緣眾生。動經百千萬佛。不聞不見。非佛力劣也。譬如日月周四天下。破諸闇冥。而盲者不見。非日不明也。雷震裂耳。而聾者不聞。非聲不厲也。覺諸緣理。號

之曰佛。若情強違緣理。非正覺也。是故眾生無量佛。亦無量。徵佛莫問有緣無緣。何不盡度一切眾生者。非理言也。五者眾生若盡。世間卽墮有邊。以是義故。卽有無量佛度一切眾生。問曰。若眾生不可盡。世間復須墮無邊。無邊故佛則不能實度一切眾生。答曰。世間非有邊。非無邊。亦絕四句。佛令眾生離此四句。名之爲度。其實非度。非不度。非盡。非不盡。譬如夢渡大河。值濤波諸難。其人畏怖。叫聲徹外。外人喚覺。坦然無憂。但爲渡夢。不爲渡河。問曰。言度與不度。皆墮邊見。何以但說度。一切眾生爲大乘廣智。不說不度。

眾生爲大乘廣智。答曰。眾生莫不厭苦求樂。長縛求解。聞度則歸向。聞不度。不知所以不度。便謂佛非大慈悲。則不歸向。故長寢久夢。無由可息。爲是人故。多說度。不說不度。復次。諸法無行經亦言。佛不得佛道。亦不度眾生。凡夫強分別。作佛度眾生。言度眾生。是對治悉檀。言不度眾生。是第一義悉檀。二言各有所以。不相違背。問曰。如夢得息。豈不是度耶。若一切眾生所夢皆息。世間豈不盡。答曰。說夢爲世間。若夢息。則無夢者。若無夢者。亦不說度者。如是知世間卽是出世間。雖度無量眾生。則不墮顛倒。

四者疑佛不得一切種智。何以故。若能徧知諸法。諸法墮有邊故。若不能徧知。則非一切種智故。對治此疑。故言無等無倫最上勝智。無等無倫最上勝智者。凡夫智虛妄。佛智如實。虛實懸殊。理無得等。故言無等。聲聞辟支佛欲有所知。入定方知。出定不知。又知亦有限。佛得如實三昧。常在深定而徧知。照萬法二與無二。深法非倫。故言無倫。八地已上菩薩。雖得報生三昧。用無出入。而習氣微熏。三昧不極明淨。形待佛智。猶爲有上。佛智斷具足。如法而照。法無量故。照亦無量。譬如函大蓋亦大。故言最上。此三句亦可展

轉相成以佛智無與等者故所以無倫以無倫故最上勝亦可最上勝故無等無等故無倫。但言無等便足復何以須下二句者。如須陀洹智不與阿羅漢等而是其類。初地至十地亦如是。智雖不等非不其倫。何以故。非最上故。汝以知有邊爲難疑。佛非一切智者。是事不然。

問曰。下輩生中云。十念相續便得往生。云何名爲十念相續。答曰。譬如有人空曠迴處。值遇怨賊。拔刀奮勇。直來欲殺其人。勁走視渡一河。若得渡河。首領可全。爾時但念渡河方便。我至河岸。爲著衣渡。爲脫衣。

渡。若著衣納。恐不得過。若脫衣納。恐無得暇。但有此念。更無他緣。唯念何當渡河。卽是一念。如是不雜心。名爲十念相續。行者亦爾。念阿彌陀佛。如彼念渡經。於十念。若念佛名字。若念佛相好。若念佛光明。若念佛神力。若念佛功德。若念佛智慧。若念佛本願。無他心間雜。心心相次。乃至十念。名爲十念相續。一往言十念相續。似若不難。然凡夫心猶野馬。識劇猿猴。馳騁六塵。不暫停息。宜至信心。預自剋念。使積習成性。善根堅固也。如佛告頻婆娑羅王。人積善行。死無惡念。如樹西傾。倒必隨西。若使風刀一至。百苦湊身。若

前習不在懷。念何可辦。又宜同志五三。共結言要。垂命終時。迭相開曉。爲稱阿彌陀佛名號。願生安樂。聲聲相次。使成十念也。譬如蠟印印泥。印壞文成。此命斷時。卽是生安樂時。一入正定聚。更何所憂也。

略論安樂淨土義

往生論註

功德主名錄

委印文號：1 0 1 3 9 9

六〇、〇〇〇元：香港佛陀教育協會。

以上共計新台幣：六〇、〇〇〇元，恭印三、〇〇〇本。

回向：天下和順，日月清明，風雨以時，災厲不起，國豐民安，兵戈無用，崇德興仁，務修禮讓，國無盜賊，無有怨枉，強不凌弱，各得其所。


祝願法界一切有情，所有六道四生，宿世冤親，現世業債，咸憑法力，悉得解脫。祝願現生者增福延壽，發菩提心，常隨佛學，勤修精進，利濟群生。

祝願已故者往生淨土，同出苦輪，共登覺岸。

附記：本會接受善信委託，代印經書、佛像，其必要之費用，均經本會審慎評估；若有結餘，均續作本會之印（購）經書及運費，為施主廣積陰德，歡迎十方大德善加利用。

普為出資及讀誦受持
輾轉流通者回向偈曰

願以此功德
消除宿現業
增長諸福慧
圓成勝善根
所有刀兵劫
及與饑饉等
悉皆盡滅除
人各習禮讓
讀誦受持人
輾轉流通者
現眷咸安樂
先亡獲超昇
風雨常調順
人民悉康寧
法界諸含識
同證無上道



佛曆二五五六年／西元二〇一二年九月

往生論註

發行人：林國營

出版者：財團法人佛陀教育基金會

地址：100 台北市杭州南路一段五十五號十一樓

網址：<http://www.budaedu.org>

E-mail：budaedu@budaedu.org

電話：(02) 2395 1198 傳真：(02) 2391 1341 五

劃撥戶名：財團法人佛陀教育基金會 郵局劃撥帳號：〇七六九九七七

銀行名稱：台北富邦銀行東門分行（請於電匯或轉帳後告知本會用途）

銀行帳號：五八〇二一〇一一九三三三三

本會經書免費結緣之請取方式如下：

(一) 親臨本會三樓講堂。(二) 利用傳真：(02) 2395959

(三) 撥打電話：(02) 23951198 分機：11 / 12

(四) 網址：<http://www.budaedu.org/books/>。(五) 寫信指定：本會法寶流通股。

為提高服務效率，請您嚴謹考量，慎選所需經書；儘量少用電話，多利用文字方式請取，並請詳寫經書名稱、冊數及收件人姓名、地址、電話、郵遞區號，以減少本會之處理時間；若大量申請，請註明用途，且避免姓名、地址等文字上書寫之錯誤。

◎本會經書，歡迎翻印（請勿增刪），贈送流通，功德無量。

◎本會交通——

※捷運：善導寺站5號出口，至杭州南路右轉，過兩個紅綠燈。

※公車站牌：審計部站→212、299、232、205、276、605、287、262

台北商業技術學院→253、297、237 仁愛路二段→222、297

開南商工→208、295、297、15、22、671

行政院新聞局出版事業登記證局版臺業字第三八六九號

